

宋

史

八九

相傳卷第六十四

宋史三百五

醫官在國醫國書中書丞相醫官領經筵掌教臣脫等奉

東修

楊億

弟偉

從子絃

晁迥

子宗慤

劉筠

薛映

楊億字大年建州浦城人祖文逸南唐玉山令億將生文
逸夢一道士自稱懷玉山人來謁未幾億生有毛被體長
尺餘經月乃落能言母以小經口授隨即成誦七歲能屬
文對客談論有老成風雍熙初年十一太宗聞其名詔江
南轉運使張去華就試詞藝送闕下連三日得對試詩賦

五篇下筆立成太宗深加賞異命內侍都知王仁睿送至中書又賦詩一章宰相驚其俊異削章爲賀翌日下制曰汝方髻鬪不由師訓精爽神助文字生知越景絕塵一日千里子有望於汝也即授祕書省正字特賜袍笏俄丁外艱服除會從祖徽之知許州億往依焉務學晝夜不息徽之間與語歎曰興吾門者在汝矣淳化中詣闕獻文改太常寺奉禮郎仍令讀書祕閣獻二京賦命試翰林賜進士第遷光祿寺丞屬後苑賞花曲宴太宗召命賦詩于坐側又上金明池頌太宗誦其警句于宰相明年三月苑中曲宴億復以詩獻太宗訝有司不時召宰相言舊制未貼職

者不預即以億直集賢院表求歸鄉里賜錢十五萬至道
初太宗親製九絃琴五絃阮文士奏頌者衆獨稱億爲優
賜緋魚二年春遷著作佐郎帝知其貧屢有霑齎嘗命爲
越王生辰使時公卿表疏多假文於億名稱益著真宗在
京府徽之爲首僚郎中書疏悉億草定即位初超拜左正
言詔錢若水修太宗實錄奏億參預凡八十卷而億獨草
五十六卷書成乞外補就養知處州真宗稱其才長於史
學留不遣固請乃許之任郡人周啓明篤學有文深加禮
待召還拜左司諫知制誥賜金紫咸平中西鄙未寧詔近
臣議靈州棄守之事億上疏曰臣嘗讀史見漢武北築朔

方之郡平津侯諫以爲罷敞中國以奉無用之地願罷之
上使辯士朱買臣等發十策以難平津平津不能對臣以
爲平津爲賢相非不能折買臣之舌蓋所以將順人君之
意爾舊稱朔方地在要荒之外聲教不及元朔中大將軍
衛青奮兵掠地列置郡縣今靈州蓋朔方之故墟僻介西
鄙數百里間無有水草烽火亭障不相望當其道路不墜
饟饋無虞猶足以張大國之威聲爲中原之扞蔽自邊境
屢驚兇黨猖熾爵賞之而不恭討罰之而無獲自曹光寶
白守榮馬紹忠及王榮之敗資糧屛屨所失至多將士丁
夫相枕而死以至募商人輸帛入穀償價數倍孤壤築城

邊民繹騷國帑匱乏不能制邊人之命及濟靈武之急數
年之間兇黨逾盛靈武危堞歸然僅存河外五城繼聞陷
沒但堅壁清野坐食糗糧閉壘枕戈苟度朝夕未嘗出一
兵馳一騎敢與之角此靈武之存無益明矣平津所言罷
敝中國以奉無用之地正今日謂也臣以爲存有太害棄
有大利國家輓粟之勞士卒流離之苦悉皆免焉堯舜禹
聖之盛者也地不過數千里而明德格天四門穆穆武丁
成王商周之明主也然地東不過江黃西不過氐羌南不
過蠻荆北不過太原而頌聲並作號爲至治及秦漢窮兵
拓土肝腦塗地校其功德豈可同年而語哉昔西漢賈捐

之建議棄朱崖當時公卿亦有異論元帝力排衆說奪專獨見下詔廢之人頌其德故其詔曰議者以棄朱崖羞威不行夫通于時變即憂萬民之飢餓危孰大焉且宗廟之祭凶年不備况乎避不嫌之辱哉臣以爲類于靈武也必以失地爲言即燕薊八州河湟五郡所失多矣何必此爲臣竊惟太祖命姚弋弼領慶州董遵誨領環州統兵裁五六千悉付以閩外之事士卒効命疆場晏然朝廷無旰食之憂疆場無羽書之警臣乞選將臨邊賜給廩賦資以策略許以便宜而行儻寇擾內屬撓之以勁兵示之以大信懷荒振遠諭以賞格彼則奔潰衆叛安能與大邦爲敵哉

若欲謀成廟堂功在漏刻臣以爲彼衆方黠積財猶豐未
可以歲月破也直須棄靈州保環慶然後以計困之爾如
臣之策得驍將數人提銳兵一二萬給數縣賦以資所用
令分守邊城則寇可就擒而朝廷得以無虞矣景德初以
家貧乞典郡江左詔令知通進銀臺司兼門下封駁事時
以吏部銓主事前宜黃簿王太沖爲大理評事億以丞吏
之賤不宜任清秩即封詔還未幾太沖補外俄判史館會
修冊府元龜億與王欽若同總其事其序次體制皆億所
定羣僚分撰篇序詔經億竄定方用之二年召爲翰林學
士又同修國史凡變例多出億手大中祥符初加兵部員

外郎戶部郎中五年以疾在告遣中使致太醫視之億拜
章謝上作詩批紙尾有副子前席待名賢之句以久疾求
解近職優詔不許但權免朝直億剛介寡合在書局唯與
李維路振刀衍陳越劉筠輩厚善當時文士咸賴其題品
或被貶議者退多怨誹王欽若驟貴億素薄其人欽若銜
之屢挾其失陳彭年方以文史售進忌億名出其右相與
毀訾上素重億皆不惑其說億有別墅在陽翟億母往視
之因得疾請歸省不待報而行上親緘藥劑加金帛以賜
億素體羸至是以病間請解官有疾憲官劾億不俟命而
去授太常少卿分司西京許就所居養療嘗作君可思賦

以抒忠憤冊府元龜成進秩祕書監七年病愈起知汝州
會加上玉皇聖號表求陪預即代還以爲參詳儀制副使
知禮儀院判祕閣太常寺天禧二年冬拜工部侍郎明年
權同知貢舉坐考較差謬降授祕書監丁內艱屬行郊禮
以億典司禮樂未卒哭起復工部侍郎令視事四年復爲
翰林學士受詔注釋御集又兼史館修撰判館事權景靈
宮副使十二月卒年四十七錄其子絃爲太常寺奉禮郎
億天性穎悟自幼及終不離翰墨文格雄健才思敏捷略
不凝滯對客談笑揮翰不輟精密有規裁善細字起草一
幅數千言不加點竄當時學者翕然宗之而博覽強記尤

長典章制度時多取正喜誨誘後進以成名者甚衆人有
片辭可紀必爲諷誦手集當世之述作爲筆苑時文錄數
十篇重交游性耿介尚名節多周給親友故廩祿亦隨而
盡留心釋典禪觀之學所著括蒼武夷潁陰韓城退居汝
陽蓬山冠蓋等集內外制刀筆共一百九十四卷弟倚景
德中舉進士得第三等及第以億故升爲第二等億無子
以從子紘爲後弟偉

偉字子奇幼學于億天僖元年獻頌召試學士院賜進士
及第以試祕書省校書郎知衢州龍游縣再補蘄州錄事
參軍國子監薦爲直講駙馬都尉李遵勗守澶州辟簽書

鎮寧軍節度判官事遷大理寺丞知河間縣再遷太常博士用近臣薦爲集賢校理通判單州會巡檢部卒李素合州卒二百餘人謀殺巡檢使入鼓角門州將不敢出偉挺身往問曰若屬何爲而反俱曰將有訴于州非反也偉曰持兵來非反而何若屬皆有父母妻子以一朝忿而欲魚肉之乎悉令投兵坐籍首惡得十餘人斬之徙知祥符縣提點開封府界諸縣鎮公事權開封府判官又判三司開拆司累遷尚書兵部員外郎同修起居注偉清慎無治劇才常秉小笏以朝知制誥缺中書以偉名進仁宗曰此非秉小笏者邪遂命知制誥權諫院嘗曰諫臣宜陳列大事

細故何足論然當時譏其亡補遷刑部郎中爲翰林學士
祀明堂遷右司郎中判太常寺爲羣牧使兼侍讀學士進
中書舍人卒贈尚書禮部侍郎

絃字望之以蔭歷官知鄞縣鄞濱海惡少販魚鹽者羣居
洲島或掠商人財物入海吏不能禁絃至設方略使識者
質惡少船及歸始給還且戒諭之由是不敢爲盜以億文
獻賜進士出身通判越州知筠州提點江東刑獄除轉運
按察使江東饑絃開義倉振之吏持不可絃曰義倉爲民
也稍稽人將殍矣絃御下急常曰不法之人不可貸去之
止不利一家爾豈可使郡邑千萬家俱受害邪聞者望風

解去或過期不敢之官與王鼎王綽號江東三虎坐降知
衡州徙越州爲荆南轉運使徙福建不赴知湖州復爲江
東轉運使官至太常少卿卒紘性嚴雖家居兒女不敢妄
言笑聚書數萬卷手抄事實名窺豹篇

晁迥字明遠世爲澶州清豐人自其父佺始徙家彭門迥
舉進士爲大理評事歷知岳州錄事參軍改將作監丞稍
遷殿中丞坐失入囚死罪奪二官復將作丞監徐婺三州
稅遷太常丞真宗即位用宰相呂端參知政事李沆薦擢
右正言直史館獻咸平新書五十篇又獻理樞一編召試
除右司諫知制誥判尚書刑部帝北征雍王元份留守京

師加右諫議大夫爲判官進翰林學士未幾知審官院爲明德章穆二園陵禮儀使同修國史知大中祥符元年貢舉封泰山祀汾陰同太常詳定儀注累遷尚書工部侍郎使契丹還奏北庭記加史館修撰知通進銀臺司獻玉清昭應宮頌其子宗操繼上景靈宮慶成歌帝曰迴父子同獻歌頌措紳間美事也史成擢刑部侍郎進承旨時朝廷方修禮文之事詔令多出迴手嘗夜召對帝令內侍持燭送歸院方盛暑爲蠲宿直令三五日一至院迴辭以非故事乃聽俟秋還直遷兵部侍郎請分司西京特拜工部尚書集賢院學士判西京留司御史臺賜一子官河南以就

養仁宗即位遷禮部尚書居臺六年累章請老以太子少保致仕給全奉歲時賜賚如學士天聖中迴年八十一召宴太清樓免舞蹈子宗慤爲知制誥侍從同預宴迴坐御史中丞之南與宰臣同賜御飛白大字旣罷所以寵賚者甚厚進太子少傅後復召對延和殿帝訪以洪範雨暘之應對曰比年災變荐臻此天所以警陛下願陛下修飭王事以當天心庶幾轉亂而爲祥也旣而獻斧宸慎刑箴大順審刑無盡燈頌凡五篇及感疾絕人事屏醫藥具冠服而卒年八十四罷朝一日贈太子太保謚文元迴善吐納養生之術通釋老書以經傳傳致爲一家之說性樂易寬

簡服道履正雖貴勢無所屈歷官臨事未嘗挾情害物真宗數稱其好學長者楊億嘗謂迴所作書命無過褒得代言之體喜質正經史疑義標括字類有以術命語迴迴曰自然之分天命也樂天不憂知命也推理安常委命也何必逆計未然乎所著翰林集三十卷道院集十五卷法藏碎金錄十卷耆智餘書隨因紀述昭德新編各三卷子宗

慤

宗慤字世良以父蔭爲祕書省校書郎屢獻歌頌召試賜進士及第又除館閣校勘三遷大理寺丞集賢校理兼注釋御集檢閱官迴領西臺宗慤求便養通判許州仁宗即

位遷殿中丞同修起居注天聖中百官轉對宗慤請減上
供墾閒田擇獄官令監司舉縣令累遷尚書祠部員外郎
知制誥宋綬嘗謂自唐以來唯楊於陵身見其子嗣復繼
掌書命今始有晁氏焉父憂奪喪管勾會靈觀入翰林爲
學士母亡又起復兼龍圖閣學士權發遣開封府事辨雪
疑獄有能名元昊反關中久宿師以宗慤安撫陝西與夏
竦議攻守策未還道拜右諫議大夫參知政事會朝廷以
金飾胡牀及金汲器賜喃廝羅宗慤曰仲叔于奚辭邑請
繁纓孔子曰不如多與之邑繁纓諸侯之馬飾猶不可與
陪臣况以乘輿之器賜外臣乎必欲優其禮不若加賜金

帛後從帝郊祠感疾數求罷除資政殿學士給事中數日卒贈工部尚書謚文莊宗慤性敦厚事父母孝篤於故舊凡任子恩皆先其族人在翰林一夕草將相五制褒揚訓戒人得所宜嘗密詔訪邊策陳七事頗施用之

劉筠字子儀大名人舉進士爲館陶縣尉還會詔知制誥楊億試選人校太清樓書擢筠第一以大理評事爲祕閣校理真宗北巡命知大名府觀察判官事自邊鄙罷兵國家閒暇帝垂意篇籍始集諸儒考論文章爲一代之典筠預脩圖經及冊府元龜推爲精敏真宗將祀汾睢屢得嘉雪召筠及監察御史陳從易崇和殿賦歌詩帝數稱善車

駕西巡又命筠纂土訓是時四方獻符瑞天子方興禮文
之事筠數上賦頌及冊府元龜成進左正言直史館修起
居注嘗屬疾予告滿輒再予告積三百日每詔續其奉遷左
司諫知制誥加史館修撰出知鄧州徙陳州還糾察在京
刑獄知貢舉遷尚書兵部員外郎復請鄧州未行進翰林
學士初筠嘗草丁謂與李迪罷相制旣而謂復留令別草
制筠不奉詔乃更召晏殊筠自院出遇殊樞密院南門殊
側面而過不敢揖蓋內有所愧也帝久疾謂浸擅權筠曰
姦人用事安可一日居此請補外以右諫議大夫知廬州
仁宗即位遷給事中復召爲翰林學士踰月拜御史中丞

先是三院御史言事皆先白中丞筠榜臺中御史自言事
母白丞雜知天聖二年貢舉數以疾告進尚書禮部侍郎
樞密直學士知潁州召還復知貢舉進翰林學士承旨兼
龍圖閣直學士同修國史判尚書都省祀南郊爲禮儀使
請宿齋太廟日罷朝饗玉清昭應宮俟禮成備鑾駕恭謝
從之筠素愛廬江遂築室城中構閣藏前後所賜書帝飛
白書曰眞宗聖文祕奉之閣再知廬州營冢墓作棺自爲
銘刻之旣病徙于書閣卒筠景德以來居文翰之選其文
辭善對偶尤工爲詩初爲楊億所識拔後遂與齊名時號
楊劉凡三入禁林又三典貢部以策論升降天下士自筠

始性不苟合臨事明達而其治尚簡嚴然晚爲陽翟同姓富人奏求恩澤清議少之著冊府應言榮遇禁林肥川中司汝陰三人玉堂凡七集一子早卒田廬沒官包拯少時頗爲筠所知及拯顯奏其族子爲後又請還所沒田廬云薛映字景陽唐中書令元超八世孫後家於蜀父允中事孟氏爲給事中歸朝爲尚書都官郎中映進士及第授大理評事歷通判綿宋昇州累遷太常丞王化基薦爲監察御史知開封縣太宗召對爲江南轉運使改左正言直昭文館爲江淮兩浙茶鹽制置副使改京東轉運使徙河東兼河西隨軍求便親知相州再領漕京東積遷尚書禮部

郎中擢知制誥權判吏部流內銓兼制置羣牧使司梁顥
安撫河北還權判度支映以右諫議大夫知杭州映臨決
蠶鏡庭無留事轉運使姚鉉移屬州當直司毋得輒斷徒
以上罪映即奏徒流笞杖自有科條苟情狀明白何必繫
獄以累和氣請詔天下凡徒流罪於長吏前對辨無所異
聽遣決之朝廷施用其言與鉉既不協遂發鉉納部內女
口及鬻釳器抑取其直又廣市綾羅不輸稅真宗遣御史
臺推勘官儲拱劾鉉得實貶連州文學映坐嘗召人取告
鉉狀當贖金帝特貰之在杭五年入知通進銀臺司兼門
下封駁事封泰山爲東京留守判官遷給事中勾當三班

院出知河南府祀汾陰還駐蹕西京以映有治狀賜御書
嘉獎遷尚書工部侍郎集賢院學士判尚書都省進樞密
直學士知并州建言州以牛賦民出租牛死租不得蠲帝
覽章矍然曰此朝廷豈知邪因令諸州條奏悉蠲之頃之
糾察在京刑獄再判都省歷尚書左丞知揚州徙并州又
徙永興軍拜工部尚書兼御史中丞仁宗即位遷禮部再
爲集賢院學士判院事知曹州分司南京卒贈右僕射謚
文恭映好學有文該覽彊記善筆札章奏尺牘下筆立成
爲治嚴明吏不能欺每五鼓冠帶黎明據案決事雖寒暑
無一日異也子耀卿祕閣校理孫紳直龍圖閣

論曰自唐末詞氣浸敝迄于五季甚矣先民有言政厖土
 裂大音不完必混一而後振宋一海內文治日起揚億首
 以辭章擅天下為時所宗蓋其清忠鯁亮之氣未卒大施
 悉發於言宜乎雄偉而浩博也劉筠後出能與齊名氣象
 似爾至於文體之今古時習使然遑暇議是哉晁迴寬易
 與物無忤父子先後典書命稱為名臣薛映學藝更術俱
 優而挾忿以挾人之私君子病之

列傳卷第六十四

列傳卷第六十五

宋史三百六

開府儀同三司上柱國錄軍國重事前中書右丞相監國嬰領經筵事都總裁臣脫脫等奉

敕修

謝泌

孫何弟僅

朱台符

戚綸

張去華

子師德

樂黃目

柴成務

謝泌字宗源歙州歙人自言晉太保安二十七世孫少好學有志操賈黃中知宣州一見竒之太平興國五年進士解褐大理評事知清川縣徙彰明遷著作佐郎端拱初為殿中丞獻所著文十編古今類要三十卷召試中書以直史館賜緋時言事者衆詔閣門非涉僥望乃許受之繇是

言路稍壅泌抗疏陳其不可且言邊鄙有事民政未乂狂夫之言聖人擇焉苟詰而拒之四聰之明將有所蔽願采其可者拒其不可者庶顯顯之情得以上達復言國家圖書多失次序唐景龍中嘗分經史子集爲四庫命薛稷沈佺期武平一馬懷素分掌望遵復故事遂令直館分典四部以泌知集庫改左正言使嶺南採訪淳化二年久旱復上言時政得失時王禹偁上言請自今庶官候謁宰相並須朝罷於政事堂樞密使預坐接見將以杜私請詔從之泌上言曰伏覩明詔不許宰相樞密使見賓客是疑大臣以私也書曰任賢勿貳去邪勿疑張說謂姚元崇曰外則

踈而接物內則謹以事君此真大臣之體今天下至廣萬
幾至繁陛下以聰明寄於輔臣自非接下何以悉知外事
若令都堂候見則庶官請見咨事略無解衣之暇今陛下
囊括宇宙總攬英豪朝廷無巧言之士方面無姑息之臣
奈何疑執政爲衰世之事乎王禹偁昧於大體妄有陳述
太宗覽奏即追還前詔仍以泌所上表送史館會修正殿
頗施采繪泌復上疏亟命代以丹堊且嘉其忠蓋拜左司
諫賜金紫錢三十萬一日得對便殿太宗稱其任直敢言
必奏曰陛下從諫如流故臣得以竭誠昔唐季孟昌圖者
朝疏諫而夕去位鑒於前代取亂宜矣太宗動色久之時

羣臣升殿言事者既可其奏得專達于有司頗容巧妄泌請自今凡政事送中書機事送樞密金穀送三司覆奏而行從之俄判三司鹽鐵勾院奉詔解送國學舉人黜落既多羣聚喧詬懷甓以伺泌出泌知之潛由他塗入史館數宿不敢出請對自陳太宗問何官駟導嚴肅都人畏避有以臺雜對者即授泌虞部員外郎兼侍御史知雜事上元觀燈泌特預召自是爲例轉金部員外郎充鹽鐵副使頃之魏羽爲使即泌之外舅以親嫌改度支副使因郊祀條上軍士賞給之數太宗曰朕惜金帛止備賞賜爾泌因曰唐德宗朱泚之亂後唐莊宗馬射之禍比皆賞軍不豐之致

今陛下薄於躬御賞賜特優實歷代之所難也俄與王沔
同磨勘京朝官太宗孜孜爲治每御長春殿視事罷復即
崇政殿臨決日旰未進御膳泌言請自今長春罷政旣膳
後御便坐不報俄知三班通進銀臺司出知湖州再遷主
客郎中知虢州真宗初邊人屢寇泌上疏曰臣竊惟聖心
所切者欲天下朝夕太平爾雍熙末趙普錄唐姚崇太平
十事以獻未幾普復相時稱致治之策無出於此尋普病
又遼騎擾邊因循未行今北邊謐寧繼遷請命則可行於
今日矣臣以爲先朝未盡行者俟陛下爾陛下自臨大寶
邊不加兵西北肅然民安歲登則太平之象復何遠哉至

於省不急之務削煩苛之政抑奔競來直言斯皆致太平之術又豈讓唐開元之治也議者或謂方今用兵異於開元且開元邊戎孔熾明皇卒與之和至如漢高祖亦然此皆屈己以寧天下豈以輕大國而競小忿乎請以近事言往歲討交趾王師一動南方幾搖先皇以爲得之無用棄之實便及授官爲蕃屏則至今鼠伏石晉之末恥講和契丹遂致天下橫流豈得爲強或者有言敵所嗜者禽色所貪者財利餘無他智計先朝平晉之後若不舉兵臨之但與財帛則幽薊不日納土矣察此乃知其情古猶今也漢祖明皇所用之計正可以餌其心矣臣伏覩近詔以不逞

之徒所陳述皆閭閻事臣聞古先哲王詢于芻蕘察於邇
言者蓋慮視聽之蔽故採此以達物情亦罕行其事也先
朝有侯莫陳利用陳廷山鄭昌嗣趙贊之徒喋喋利口賴
先帝聖聰尋翦除之然爲患已深矣臣又聞輔時佐主建
萬世之基立不拔之策者必倚老成之人至如成康刑措
由任周召文景清靜不易蕭曹明皇太平亦資姚宋夫精
練國政斟酌王度未聞市井之胥走塵之吏可當其任也
惟陛下察往古用賢致治之道則賢者亦必盡忠竭力以
輔成太平之治矣咸平二年徙知同州代還知鼓司登聞
院五年與陳恕同知貢舉復知通進銀臺司加刑部出爲

兩浙轉運使近制文武官告老皆遷秩令錄授朝官並給半奉泌言請自今七十以上求退者許致仕因疾及歷任犯贓者聽從便詔可徙知福州代還民懷其愛刻石以紀去思轉兵部郎中復知審官院直昭文館知荆南府改襄州遷太常少卿右諫議大夫判吏部銓大中祥符五年卒年六十三泌性端直然好方外之學疾革服道士服端坐死帝聞而嗟異遣使臨問恤賜錄其子衍爲太常寺奉禮郎衍將作監主簿衍爲太子中舍

孫何字漢公蔡州汝陽人祖鎰唐末秦宗權據州強以賓佐起之鎰僞疾不應還家以講授爲業父庸字鼎臣顯德

中獻贊聖策九篇引唐貞觀所行事以魏玄成自況得對
言曰武不可黷歛不可厚奢不可放欲不可極世宗竒其
言命中書試補開封兵曹掾建隆初爲河南簿太平興國
六年鴻臚少卿劉章薦其材改左贊善大夫歷殿中丞知
龍州而卒何十歲識音韻十五能屬文篤學嗜古爲文必
本經義在貢籍中其有聲與丁謂齊名友善時輩號爲孫
丁王禹偁尤推重之嘗作兩晉名臣贊宋詩二十篇春秋
意尊儒教議聞於時淳化三年舉進士開封府禮部俱首
薦及第又得甲科解褐將作監丞通判陝州召入直史館
賜緋遷祕書丞京西轉運副使歷右正言改右司諫真宗

初何獻五議其一請擇儒臣有方略者統兵其二請世祿之家肄業太學寒雋之士州郡推薦而禁投贖自媒者其三請復制舉其四請行鄉飲酒禮其五請以能授官勿以恩慶例遷上覽而善之咸平二年舉入閣故事何次當待制獻疏曰六卿分職邦家之大柄也有吏部辨考績而育人材有兵部簡車徒而治戎備有戶部正版圖而阜貨財有刑部謹紀律而誅暴強有禮部祀神示而選賢俊有工部繕宮室而修隄防六職舉而天下之事備矣故周之會府漢之尚書立庶政之根本提百司之綱紀今僕率其屬丞郎分其行二十四司粲焉星拱郎中負外判其曹主事

令史承其事四海九州之大若網在綱唐之盛時亦不聞別分利權朔使額而軍須取足及玄宗侈心既萌召發既廣租調不充於是蕭景揚劍始以地官判度支而宇文融爲租調地稅使始開利孔以構禍階至于肅代則有司之職盡廢而言利之臣攘臂於其間矣於是叛亂相仍經費不充迫於軍期切於國計用救當時之急率以權宜裁之五代短促曾莫是思今國家三聖相承五兵不試太平之業垂統立制在此時也所宜三部使額還之六卿慎擇戶部尚書一人專掌鹽鐵使事俾金部郎中負外郎判之又擇本行侍郎二人分掌度支戶部使事各以本曹郎中負

外郎分判之則三使洎判官雖省猶不省也仍命左右司郎中員外總知帳目分勾稽違職守有常規程既定則進無掎克之慮退有詳練之名周官唐式可以復矣茲事非艱在陛下行之爾是冬從幸大名詔訪邊事何䟽曰陛下嗣位以來訓師擇將可謂至多以高祖之大度兼蕭王之赤心神武冠於百王精兵倍於前代分閫仗鉞者固當以身先士卒爲心賊遺君父爲恥而列城相望堅壁自全手握強兵坐違成筭遂使腥羶得計虵豕肆行焚劫我郡縣係累我黎庶陛下攄人神之憤怒憫河朔之生靈爰御六師親幸澶魏天聲一振敵騎四逃雖鎮定道路已通而德

棟烽塵未息此殆將帥或未得人邊奏或有壅闕鄰境不
相救援糗糧須俟轉輸之所致也將帥者何或恃勇無謀
或忌功玩寇但全城堡不恤人民邊奏者何護塞之臣固
祿守位城池焚劫不以實聞老幼殺傷託言他盜不救援
者何緣邊州縣城壘參錯如輔車唇齒之相依若頭目手
足之相衛託稱兵少不出或待奏可乃行俟輦輸者何敵
騎往還恣馳鳥逝贏糧景從萬兩方行迨乎我來寇已遁
去此四者當今急務擇將帥則莫若文武之內參用謀臣
防壅闕則莫若凡奏邊防陛見庭問合救援則莫若督以
軍令聽其便宜運糗糧則莫若輕齎疾驅角彼趨捷今大

駕旣駐鄴下契丹終不敢萌心南牧所慮荐食者惟東北
無備之城繕完周防不可不慎且蜂蠆有毒豺狼無厭今
契丹西畏大兵北無歸路獸窮則搏物不可輕餘孽尚或
稽誅奔突亦宜預備大河津濟處處有之亦望量屯禁兵
扼其要害則請和之使不日可待真宗覽而嘉之及傅潛
逗撓無功何又請斬潛以徇俄權戶部判官出爲京東轉
運副使又獻疏請擇州縣守宰省三司冗員遴選法官增
秩益奉未幾徙兩浙轉運使加起居舍人景德初代還判
太常禮院俄與晁迥陳堯咨並命知制誥賜金紫掌三班
院何先已被疾勉強親職一日奏事上前墜奏牘於地俯

而取之復墜笏有司劾以失儀詔釋之何慙上章求改少
卿監分司西京養疾上不許第賜告遣醫診視醫勉其然
艾何答曰死生有命卒不聽是冬卒年四十四上在澶淵
聞之憫惜錄其子言爲大理評事何樂名教勤接士類後
進之有詞藝者必爲稱揚然性下急不能容物在浙右專
務峻刻州郡病焉好學著駁史通十餘篇有集四十卷弟
僅

僅字鄰幾少勤學與何俱有名于時咸平元年進士甲科
兄弟連冠貢籍時人榮之解褐舒州團練推官會詔舉賢
良方正之士趙安仁以僅名聞策入第四等擢光祿寺丞

直集賢院俄知浚儀縣景德初拜太子中允開封府推官
賜緋北邊請盟遣使交聘僅首爲國母生辰使改本府判
官遷右正言知制誥賜金紫同知審官院是冬永興孫全
照求代真宗思擇循良任之御書邊蕭洎僅二名示宰相
或言僅嘗倖京府諳民政乃命知永興軍府僅純厚長者
爲政頗寬嘗詔戒焉大中祥符元年加比部員外郎代還
知審刑院頃之拜右諫議大夫集賢院學士權知開封府
改左諫議大夫出知河中府歸朝復領審刑院久次進給
事中天禧元年正月卒年四十九錄其子大理評事和爲
衛尉寺丞僅性端慤中立無競篤於儒學士大夫推其履

尚有集五十卷僅弟侑亦登進士第至殿中丞

朱台符字拱正眉州眉山人父賦舉拔萃歷度支判官卒
于殿中丞台符少聰穎十歲能屬辭嘗作黃山樓記士友
稱之及長善詞賦時太宗廷試貢士多擢敏速者台符與
同輩課試以尺晷成一賦淳化三年進士登甲科解褐將
作監丞通判青州召入直史館賜緋魚再遷祕書丞知浚
儀縣咸平元年與楊礪李若拙梁顥同知貢舉俄以京府
舊僚擢太常博士出爲京西轉運副使時北邊爲梗台符
上言曰臣聞蠻夷猾夏帝典所載商周而下數爲邊害或
振旅薄伐或和親修好歷代經營斯爲良策至於秦築長

城而黔首叛漢絕大漠而海內虛逞志一時貽笑萬代此
商鑒不遠也頃者晉氏失御中原亂離太祖深鑒往古酌
取中道與民休息遣使往來二十年間罕聞大寇大省戍
邊之卒不興出塞之兵關防謐寧府庫充溢信深得制禦
之道也幽薊之地實維我疆尚隔混同所宜開拓太宗平
晉之後因其兵勢將遂取之人雖協謀天未戢亂塘谷拒
輟用稽靈誅重興弔伐之師又作遷延之役自茲厥後大
肆兇鋒殺略軍民攻拔城砦長驅深入莫可禁止當是時
也以河爲塞而趙魏之間幾非國家所有旣阻歡盟乃爲
備禦屯士馬益將帥芻粟之飛輓金帛之委輸贍給賞賜

不可勝數繇是國家之食貨匱於河朔矣陛下自天受命
與物更始繼遷授節黎桓加爵咸命使者鎮撫其邦惟彼
契丹未加渥澤非所以柔遠能邇昭王道之無偏也今祥
禫將終中外引頸觀聽德音臣愚以爲宜於此時赦契丹
罪擇文武才略習知邊境辨說之士爲一介使以嗣位服
除修好鄰國往告諭之彼十年以來不復犯塞以臣計之
力有不足志欲歸嚮而未得其間也今若垂天覆之仁假
來王之便必歡悅慕義遣使朝貢因與之盡捐前惡復尋
舊盟利以貨財許以關市如太祖故事使之懷恩畏威則
兩國旣和無北顧之憂可以專力西鄙繼遷自當革心而

東手矣是一舉而兩得也台符又自請往使時論韙之咸
平二年春旱詔求直言台符上疏請重農積穀任將選兵
慎擇守令考課黜陟輕徭節用均賦慎刑責任大臣與圖
治道奏入優詔褒答入爲鹽鐵判官改判戶部勾院拜工
部員外郎換度支判官景德初鄭文寶爲陝西轉運或言
其張皇生事徙台符代之仍賜金紫台符俊爽好謀然頗
以刻碎爲舉職與楊覃聯事覃頗欲因仍舊貫台符則更
革煩擾議事違戾交相掎奏以不協聞命御史視其狀九
月徙台符知郢州覃知隨州三年召還會執政有不喜者
復出知洪州卒於舟次年四十二賜其子公佐同學究出

身贖錢二十萬台符好學敏於屬辭喜延譽後進有集三十卷公佐及台符弟昌符大中祥符中舉進士廷試並得第五人初昌符登科宰相言昌符即台符弟上因言台符有文學及著述可採甚嗟悼之公佐卒又以次子壽隆試將作監主簿昌符爲屯田員外郎

戚綸字仲言應天楚丘人父同文字文約自有傳綸少與兄維以文行知名篤於古學喜談名教太平興國八年舉進士解褐沂水主簿按版籍得逋戶脫口漏租者甚衆徙知太和縣同文卒於隨州綸徒步奔計千里餘俄詔起復涖職就加大理評事江外民險悍多構訟爲諭民詩五十

篇因時俗耳目之事以申規誨老幼多傳誦之每歲時必與獄囚約遣歸祀其先皆如期而還遷光祿丞坐鞫獄陳州失實免官著理道評十二篇錢若水王禹偁深所賞重久之復授大理評事知永嘉縣境有陂塘之利浚治以備水旱復為光祿寺丞轉運使又上其政績連詔褒之真宗即位轉著作佐郎通判泰州將行祕書監楊徽之薦其文學純謹宜在館閣命為祕閣校理受詔考校司天臺職官定州縣職田條制詔館閣官以舊文獻上嘉綸所著特改太常丞俄判鼓司登聞院出內府緡帛市邊糧詔綸乘傳往均市之景德元年判三司開拆賜緋魚改鹽鐵判官上

疏言邊事甚被嘉獎十月拜右正言龍圖閣待制賜金紫
時初建是職與杜鎬並命人皆榮之綸久次州縣留意吏
事每便殿請對語必移晷或夜中召見多所敷啓俄上奏
曰夫出納獻替王臣之任章疏奏議諫者之職臣屢蒙召
對皆延數刻屈萬乘之尊接一介之士聖德淵深包納荒
穢體其至愚不罪觸犯安敢循嘿不言謹撫十事該治本
者附于章左一曰王畿關輔二曰五等封建三曰復制科
四曰崇國學五曰闢曠土六曰修貢舉七曰任大臣八曰
置平糶九曰益廂軍減禁兵十曰修六典令式詞頗深切
上爲嘉獎二年與趙安仁晁迥陳充朱巽同知貢舉綸上

言取士之法多所規制並納用焉預修冊府元龜會置官
總在京諸司之務凡百三十司命綸與劉承珪同領其事
判鴻臚寺先是羣臣詔葬公私所費無定式綸言其事詔
同晁迥朱巽劉承珪校品秩之差定爲制度遂遵行之綸
以三公尚書九列之任唐末以來有司漸繁綱目不一謂
宜采通禮六典令式比類沿革著爲大典時論稱之進秩
右司諫兵部員外郎時詔禁羣臣匿名上封及非次升殿
奏事綸謂忠讜之入當開獎言路若踈遠之士尤艱請對
上頗嘉之大中祥符元年掌吏部選事上初受靈文綸上
疏曰臣遐稽載籍歷考祕文驗靈應之垂祥顧天人之相

接陛下紹二聖丕業啓萬世鴻基勤行企道恭默思玄上天降鑒瑞謀昭錫聿示臨民之戒用恢奕葉之祥乞詔有司速修大祀載命侍從摹寫祥符勒於嘉玉藏之太廟別以副本祕於中禁傳示萬葉無敢怠荒然臣恐流俗幻惑狂謀以人鬼之妖辭亂天書之真旨伏望端守玄符凝神正道以答天貺以惠烝黎是冬封泰山命綸同計度發運事禮成遷戶部郎中直昭文館待制如故被詔同編東封祥瑞封禪記會峻待制之秩又兼集賢殿修撰建議修釋奠儀頒于天下立常平倉隸司農寺以平民糴皆從之嘗宴餞种放于龍圖閣詔近臣爲序上覽綸所作稱其有史

才三年擢樞密直學士上作詩寵之祀汾陰復領發運之職居無何出知杭州就加左司郎中屬江潮爲患乃立埽岸以易柱石之制雖免水患而衆頗非其變法胡則時領發運嘗居杭州肆縱不檢厚結李溥綸素惡之通判吳耀卿則之黨也伺綸動靜密以報則則時爲當塗者所昵因共摺撫綸過徙知揚州惟揚亦溥則廵內持之益急求改僻郡徙徐州八年與劉綜並罷學士授左諫議大夫代還復知青州歲饑發公廩以救餓殍全安甚衆徙鄆州王遵誨爲勸農副使嘗任西邊寓家永興閨門不肅事將發知府寇準爲平之綸因戲謔語及準遵誨恚怒以爲汙已遂

奏綸謗訕坐左遷岳州團練副使易和州天禧四年改保
靜軍副使是冬以疾求歸故里改太常少卿分司南京五
年卒年六十八綸篤於古學善談名理喜言民政頗近迂
闊事兄維友愛甚厚維卒計聞哀慟不食者數日與交遊
故舊以信義著稱士子謁見者必詢其所業訪其志尚隨
才誘誨之嘗云歸老後得十年在鄉閭講習亦可以恢道
濟世大中祥符中繼修禮文之事綸悉參其議與陳彭年
並職屢召對多建條式恩寵甚盛樂於薦士每一奏十數
人皆當時知名士晚節爲權倖所排遂不復振善訓子弟
雖至清顯不改其純儉旣没家無餘貲張知白時知府事

輟奉以助其喪家人於几閣間得遺戒一篇大率皆誘勸
為學有集二十卷又前後奏議有機務利害備邊均田之
策別為論思集十卷分上下篇天聖中其子舜賓獻之詔
贈左諫議大夫舜賓官太子中舍

張去華字信臣開封襄邑人父誼字希賈好學不事產業
既孤諸父使督耕隴上他日往視之見闕書于樹下怒其
不親穡事詬辱之誼謂其兄曰若不就學於外素志無成
矣遂潛詣洛陽龍門書院與宗人沆鸞湜結友故名聞都
下長興中和凝掌貢舉誼舉進士調補耀州團練推官晉
天福初代還會凝由內署拜端明殿學士署門不接賓客

誼聞之即日致書于凝以爲切近之職實當顧問四方利
害所宜詢訪若不接賓客聳聳耳目坐虧職業雖爲自安
計其可得乎凝大竒之他日薦于宰相桑維翰曰凝門生
中有張誼者性介直頗涉辭藝可備諫職未幾超拜左拾
遺誼以晉室新造典禮未完數上章請復有唐故事又言
契丹有援立之助所宜敦信謹備不可自逸以啓釁端改
右補闕充集賢殿修撰歷禮部員外郎侍御史改倉部知
制誥加禮部郎中乾祐初真拜中書舍人時蘇逢吉楊邠
王章輩攀附漢祖驟得大用搢紳多附之誼不爲屈故共
嫉之遣誼爲吳越宣諭使與兵部郎中馬承翰同往賜官

告浙人每迓朝使必列步騎以自誇詭誼與承翰竊笑之
又乘酒言詞有輕發者錢俶甚恥之乃奏誼擅箠防授官
又夜集與承翰使酒語相侵坐貶均州司戶改房州司馬
歲餘卒去華幼勵學敏於屬辭以蔭補太廟齋郎周世宗
平淮南去華時年十八慨然歎曰兵戰未息民事不脩非
馭國持久之術因著南征賦治民論獻于行在召試授御
史臺主簿屬三院議事不得預坐謂所親曰簿領之職非
壯夫所爲即棄官歸鄭州杜門不出者三載建隆初始携
文遊京師大爲李昉所稱明年舉進士甲科即拜祕書郎
直史館以歲滿不遷上章自訴因言制誥張澹盧多遜殿

中侍御史師頌文學膚淺願得校其優劣太祖立召澹輩
與去華臨軒策試命陶穀等考之澹以所對不應問降秩
即擢去華爲右補闕賜襲衣銀帶鞍勒馬朝議薄其躁進
以是不遷秩者十六年嘗得對便殿詢及家世遂訴父始
忤權貴因罹重貶宰相薛居正亦爲言之太祖爲之動容
且曰漢室不道姦臣擅權此朕所親見也荆湖平命通判
道州去華上言桂管爲五嶺衝要今劉鋹保境固守賴之
爲扞蔽若大軍先克其城以趣番禺如踐無人之境且言
桂州可取之狀有詔嘉獎代還知磁乾二州選爲益州通
判遷起居舍人知鳳翔府從太宗征太原監隨駕左藏庫

四百十
傳三五
十六
就命爲京東轉運使歷左司員外郎禮部郎中太平興國
七年爲江南轉運使雍熙中王師討幽州去華督宋州饋
運至拒馬河就命掌河北轉運事三年知陝州未行著大
政要錄三十篇以獻上覽而嘉之詔書褒美賜綵五十匹
因留不遣會許王尹京命爲開封府判官殿中侍御史陳
載爲推官並賜金紫謂曰卿等皆朝之端士特加選用其
善佐吾子各賜錢百萬踰歲就拜左諫議大夫又令樞密
使王顯傳旨諭以輔成之意未幾有廬州尼道安訟弟婦
不實府不爲治械繫送本州弟婦即徐鉉妻之甥道安伐
登聞鼓言鉉以尺牘求請去華故不爲治上怒去華坐削

一任貶安州司馬歲餘召授將作少監知興元府未行改
晉州遷祕書少監知許州真宗嗣位復拜左諫議大夫未
幾遷給事中知杭州兩浙自錢氏賦民丁錢有死而不免
者去華建議請除之有司以經費所仰固執不許咸平二
年徙蘇州頃之以疾求分司西京在洛葺園廬作中隱亭
以見志景德元年改工部侍郎致仕三年卒年六十九去
華美姿貌善談論有蘊藉頗尚氣節在營道得父同門生
何氏二子教其學問受代携之京師慰薦館穀並登仕籍
嘗獻元元論大旨以養民務穡爲急真宗深所嘉賞命以
縑素寫其論爲十八軸列置龍圖閣之四壁然不飾邊幅

晉書
卷之三
王壽甫
頗爲清議所貶以是不登顯用有集十五卷子師古至國
子博士師錫殿中丞師顏國子博士

師德字尚賢去華十子最器師德嘗欲任以官辭不就去
華曰此兒必繼吾志真宗祀汾陰知河南府薛映薦其學
行又獻汾陰大禮頌于行在是歲舉進士亦爲第一時人
榮之除將作監丞通判耀州遷祕書省著作郎集賢校理
判三司都理欠憑由司建言有逋負官物而被繫本非侵
盜若惇獨貧病無以自償願特蠲之帝用其言嘗奏事殿
中帝訪以時事而條對甚備帝喜曰朕藩邸知卿父名今
又知卿才其後每遣使帝輒曰張師德可用契丹高麗使

來多以師德主之天禧初安撫淮南苦風眩改判司農寺
擢右正言知制誥判尚書刑部頃之出知潁州遷刑部員
外郎判大理寺爲羣牧使景靈宮判官再遷吏部郎中以
疾知鄧州徙汝州拜左諫議大夫罷知制誥師德孝謹有
家法不交權貴時相頗不悅之然亦多病在西掖九年不
遷卒于官有文集十卷子景憲爲太中大夫

樂黃目字公禮撫州宜黃人世仕江左李氏父史字子正
齊王景達鎮臨川召掌牋奏授祕書郎入朝爲平原主簿
太平興國五年與顏明遠劉昌言張觀並以見任官舉進
士太宗惜科第不與但授諸道掌書記史得佐武成軍旣

而復賜及第上書言事擢為著作佐郎知陵州獻金明池
賦召為三館編修雍熙三年獻所著貢舉事二十卷登科
記三十卷題解二十卷唐登科文選五十卷孝弟錄二十
卷續卓異記三卷太宗嘉其勤遷著作郎直史館轉太常
博士知舒州遷水部員外郎淳化四年春與司封員外郎
直昭文館李蕤同使兩浙巡撫加都官知黃州又獻廣孝
傳五十卷總仙記一百四十一卷詔祕閣寫本進內史好
著述然博而寡要以五帝三王皆云仙去論者嗤其詭誕
咸平初遷職方復獻廣孝新書五十卷上清文苑四十卷
出知商州史前後臨民頗以賄聞俄以老疾為言聽解職

分司西京五年郊祀畢奉留守司表入賀因得召對上見其矍鑠不衰又知篤學盡取所著書藏祕府復授舊職與黃目同在文館人以爲榮出掌西京磨勘司黃目爲京西轉運改判留司御史臺車駕幸洛召對賜金紫史久在洛因卜居有亭榭竹樹之勝優游自得未幾卒年七十八所撰又有太平寰宇記二百卷總記傳百三十卷坐知天下記四十卷商顏雜錄廣卓異記各二十卷諸仙傳二十五卷宋齊丘文傳十三卷杏園集李白別集神仙宮殿窟宅記各十卷掌上華夷圖一卷又編已所著爲仙洞集百卷黃目淳化三年舉進士補伊闕尉遷大理寺丞知壽安縣

咸平中徙知壁州未行上章言邊事召對拜殿中丞久之
直史館知浚儀縣俄上言曰伏以從政之原州縣爲急親
民之任牧宰居先今朝官以數任除知州簿尉以兩任入
縣令雖功過易見而能否難明伏見唐開元二年選羣官
有宏才通識堪致理化者授刺史都督又引新授縣令於
宣政殿試理人策一道惟鄆城令袁濟及格擢授醴泉令
餘二百人且令赴任十餘人並放令習學臣欲望自今審
官院差知州銓曹注縣令候各及三二十人一次引見於
御前試時務策一道察言觀行取其才識明於吏治達於
教化者充選其有不分曲直罔辨是非者或黜之釐務或

退守舊資如此則官得其人事無不治上頗嘉其好古歷
度支鹽鐵判官遷太常博士京西轉運使丁內艱時真宗
將幸洛以供億務繁起令涖職史尋卒上復詔權奪大中
祥符中使契丹還改工部員外郎廣南西路轉運使就拜
起居郎改陝西轉運使賜金紫陳堯咨知永興好以氣凌
黃目因表求解職不許堯咨多縱恣不法有密言其事者
詔黃目察之得實以聞堯咨坐罷龍圖閣職徙知鄧州八
年黃目入判三司三勾院天禧初馬元方奏黃目職事不
舉遂分三勾院以三人掌之黃目罷任奉朝請踰月拜兵
部員外郎知制誥充會靈觀判官黃目屬辭淹緩朝議以

爲不稱職時以盛度知京府辭不拜即遷黃自右諫議大夫權知開封府度爲會靈觀判官兩換其任仁宗升儲拜給事中兼左庶子入內副都知張繼能嘗以公事請託黃目至是未申謝事敗降左諫議大夫知荆南府明年復爲給事中徙潭州長沙月給減於荆渚特詔增之又諭以兵賦繁綜寄任之意五年代還知審官院黃自以風疾題品乖當改知通進銀臺司兼門下封駁事數月求外任得知亳州俄而幼子死聞訃慟絕所疾加甚卒年五十六錄其子理國爲衛尉寺丞定國爲大理評事黃目面柔簡默爲吏處劇亦無敗事有集五十卷又撰學海搜竒錄四十卷

聖朝郡國志二十卷黃目兄黃裳弟黃庭黃裳孫滋並進士及第黃裳黃庭皆至太常博士
柴成務字寶臣曹州濟陰人也父自牧舉進士能詩至兵部員外郎成務乾德中京府拔解太宗素知其名首薦之
遂中進士甲科解褐峽州軍事推官改曹單觀察推官遷大理寺丞太平興國五年轉太常丞充陝西轉運副使賜
緋再遷殿中侍御史八年與供奉官葛彥恭使河南案行遙隄歷知果蘇二州就爲兩浙轉運使改戶部員外郎直
史館賜金紫入爲戶部判官遷本曹郎中太宗選郎官爲少卿監以成務爲光祿少卿俄奉使高麗遠俗尚拘忌以

月日未利拜恩稽留朝使成務貽書往反開諭大體國人
信服事具高麗傳淳化二年爲京東轉運使會宋州河決
成務上言河水所經地肥澱願免其租稅勸民種藝從之
召拜司封郎中知制誥賜錢三十萬時呂蒙正爲宰相嘗
與之聯外姻避嫌辭職不許俄與魏庠同知京朝官考課
四年又與庠同知給事中事凡制敕有所不便者許封駁
以聞蜀寇平使峽路安撫改左諫議大夫知河中府時銀
夏未寧蒲津當餽輓之衝事皆辦集得脫戶八百家以附
籍府城街陌頗隘狹成務曰國家承平已久如車駕臨幸
何以駐千乘萬騎邪乃奏撤民廬以廣之其後祀汾陰果

留蹕河中衢路顯敞咸以爲便真宗即位遷給事中知梓
州未幾代還又遣知青州表求俟永熙陵復土畢之任旋
受詔與錢若水等同修太宗實錄書成知揚州入判尚書
刑部本司小吏倨慢成務怒而笞之吏擊登聞鼓訴寃有
詔問狀成務歎曰忝爲長官杖一胥而被劾何面目據堂
決事邪乃求解職景德初卒年七十一成務有詞學博聞
稽古善談論好諧笑士人重其文雅然爲郡乏廉稱時論
惜之文集二十卷成務年六十六始有子比卒裁六歲授
奉禮郎名貽範後爲國子博士

論曰泌述唐漢之治台符陳商周之鑒歷布腹心奏議及

覆論當世事盡言無隱何建五議綸撫十事皆切於輔治
 何勤接士類綸樂於薦士皆足以儀表當世者也去華頗
 尚氣節而能作成後進黃目屬辭淹緩而著述浩瀚成務
 寡清白之操而專對不辱俱有足稱者焉



列傳卷第六十五

第六十六

宋史三百七

舊言上桂國靈國事前書君丞相監脩國史領經筵事都總裁巨脫脫等奉

修

喬維岳

王陟

張雍

董儼

魏廷式

盧琰

宋搏

凌策

楊覃

陳世卿

李若拙

子繹

陳知微

喬維岳字伯周陳州南頓人治三傳周顯德初登第授太湖主簿四年遷平輿令開寶中右拾遺劉稹薦其才擢為太子中舍知高郵軍通判揚州徙常州金陵平又移昇州改殿中丞太平興國初徙襄州俄丁內艱三年陳洪進表

納疆土以其子文顯爲泉州留後朝廷議擇能臣關掌郡事即起維岳爲通判會盜起仙遊莆田縣百丈鎮衆十餘萬攻城城中兵裁三千勢甚危急監軍何承矩王文寶欲盡屠其民燔府庫而遁維岳挺然抗議以爲朝廷寄以綏遠今惠澤未布盜賊連結反欲屠城豈詔意哉承矩等因復堅守旣而轉運使楊克讓率福州兵破賊圍遂解詔褒之歸朝爲淮南轉運副使遷右補闕進爲使淮河西流三十里曰山陽灣水勢湍悍運舟多罹覆溺維岳規度開故沙河自末口至淮陰磨盤口凡四十里又建安北至淮滋總五堰運舟所至十經上下其重載者皆卸糧而過舟時

壞失糧綱卒緣此為姦潛有侵盜維岳始命剗二斗門于西河第三堰二門相距踰五十步覆以厦屋設縣門積水俟潮平乃泄之建橫橋岸上築土累石以牢其址自是弊盡革而運舟往來無滯矣嘗按部至泗州慮獄法掾誤斷囚至死維岳詰之法掾俯伏且泣曰有母年八十餘今獲罪則母不能活矣維岳憫之因謂曰他日朝制按問第云轉運使令處茲罪卒如其言獲免維岳坐贖金百二十斤罷使職權知楚州遷戶部員外郎代還為度支判官轉本曹郎中出為兩浙轉運使歷知懷州滄州會考課京朝官召還屬真宗以壽王尹京精擇府僚留為開封府推官或

言維岳在淮南決獄不平允左右有知其事者辨之太宗特加賞異儲闈建兼左諭德轉太常少卿京府事繁維岳評處詳敏有王陟爲司錄真宗亦稱其明幹及踐祚即命維岳與畢士安權知開封府拜給事中知審官院維岳體肥年衰艱於拜趨陳乞外遷小州上嘉其靜退特授海州刺史咸平初知蘇州素病風上以吳中多食魚蟹乃徙壽州仍命太醫馳療之四年卒年七十六贈兵部侍郎官給其葬大中祥符中錄其孫世昌獻之並賜同學究出身維岳明習吏事有治劇才在懷州王欽若始舉進士維岳知其貴又善待陳彭年自刺郡連奏爲通判皆稱薦之

王陟者潞州上黨人淳化三年舉進士補嵐州團練推官
內侍羅懷嗣言其督運有勞遷晉州觀察推官至道初度
支判官李擇言薦為著作佐郎同判大名府留知開封府
司錄參軍前司錄閻仲卿喜云為屢升殿奏事真宗尹京
時頗不悅及陟代之以謹幹聞尤被待遇即位召賜緋魚
袋改著作郎開封府推官乘傳陝西與轉運使督餽靈武
芻糧咸平初遷太常博士出為河東轉運使賜金紫時趙
保吉納款屢遣與內侍張崇貴裁度邊事正其經界又副
崇貴使夏州賜告命代歸會溫仲舒知貢舉命陟與刑部
員外郎董龜正同考試及封印卷首俄改工部員外郎知

棣州五年召歸判三司鹽鐵勾院初上以京府之舊頗隆
眷遇將加擢用會有言其在貢部舉子有納賄成名者恃
恩寵希顯要僦大第以居事遂寢六年卒上甚憫之錄其
子若拙爲奉禮郎若谷爲太廟齋郎後陟妻卒又命給其
子奉使終喪制若拙官國子博士

張雍德州安德縣人治毛氏詩開寶六年中第釋褐東關
尉太平興國初有薦其材者召歸改將作監丞知南雄州
遷太子右贊善大夫知開封府司錄參軍事俄爲祕書丞
充推官京城民王元吉者母劉早寡有姦狀爲姻族所知
憂悸成疾又懼元吉告之遂遣侍婢訴元吉寘董食中以

毒已病將死事下右軍巡按之未得實移左軍巡推吏受
劉賂掠治元吉自誣伏俄而劉死府慮囚元吉始以實對
又移付司錄盡捕元推吏稍見誣構之跡且以逮捕者衆
又獄已累月未能決府中懼其淹列狀引見詔免死決徙
元吉大呼曰府中官吏悉受我賂反使我受刑乎府不敢
決元吉歷陳所受賂主名又令妻張擊登聞鼓訴之上召
張臨軒顧問盡得其枉狀立遣中使捕元推官吏付御史
鞫治時滕中正爲中丞雍妻父也詔供奉官蔚進別鞫之
雍坐與知府劉保勳判官李繼疑初慮問元吉稱寃徙左
軍巡雍戒吏止令鞫其毒毋狀致吏訊掠慘暴上怒雍及

左右軍巡判官韓昭裔宋廷煦悉坐免所居官保勳繼凝各奪一季奉左右軍巡使殿直龐則王榮並降為殿前承旨雍熙初雍復為祕書丞御史臺推直官改鹽鐵推官遷右補闕充判官端拱初轉工部郎中判度支勾院未幾又為鹽鐵判官兼判勾院逾年以本官兼侍御史知雜事月餘出為淮南轉運使淳化初選為太府少卿二年加右諫議大夫徙兩浙轉運使入知審刑院三年充戶部使出知梓州就命為西川轉運使俄復知梓州五年蜀州青城民王小波李順作亂衆至萬人雍訓練士卒得城中兵三千餘人又募彊勇千餘守城輦綿州金帛以實帑藏推官陳

世卿治戎器掌書記施謂推鹽院判官謝濤伐山木爲竿
銷銅鍾爲箭鏑紐布爲索守械悉備遣推官盛梁請兵于
朝未幾益綿邛彭漢州永康軍悉陷于賊順入成都僭號
大蜀王勢甚盛遣其黨楊廣將十萬衆寇劔門相里貴帥
衆十萬圍梓潼雍與監軍盧斌登堞望之賊所出兵皆老
弱疲憊無鎧甲斌笑請開北門擊之雍曰不可賊或詐見
老弱設伏伺我又城中吏民心未定脫爲伏兵所突則墮
其姦計非良策也言未畢果有卒依敵樓呼嘯與外應和
雍亟斬以徇賊大設梯衝火車晝夜鼓譟攻城益急城中
大恐雍命發機石碎之火箭雜下賊稍退復治攻具城西

北隅雍給曰軍士趣治裝吾將開東門擊賊陽遣步騎五百臨東門賊升牛頭山瞰城內信然伏精兵萬餘山之東隅以待我雍即召敢死士百輩繼而下盡焚其攻具自午達申殆盡賊以爲神凶黨數乘城進戰皆不利一日北風晝晦賊乘風縱火急攻北門雍與盧斌等領兵據門立矢石間固守不動賊爲之少却長圍八十餘日會王繼恩遣石知顯來援賊始潰去遣施謂入奏上手詔褒美擢雍給事中斌西京作坊使領誠州刺史世卿掌書記謂節度判官濤觀察推官又以通判將作監丞趙賀爲太子中舍監軍供奉官辛規爲內殿崇班至道二年改工部侍郎明年

召歸復知永興軍轉禮部侍郎改刑部充度支使咸平四年遷鹽鐵使上以雍齷齷小心三司事重宜有裁制乃用王嗣宗代之又以其無過特拜戶部侍郎復知審刑院出知秦州徙鳳翔府景德初權知開封府事上覽奏獄京府囚二百餘人以爲淹繫遣給事中董儼直昭文館韓國華同慮問決遣之三年改兵部侍郎同知審官院明年車駕朝陵判留司尚書省出知鄧州大中祥符元年請老以尚書右丞致仕告命未至而卒年七十雍性鄙吝莅事勤恪善爲米鹽苛察以肅下恃其清幹受遇於時益矯厲以取名譽所至藩鎮宴犒率皆裁節聚公錢爲羨餘以輸官帑

集會賓佐糲食而已在三司置簿籍有按前急馬前急急中急之目頗為時論所訕雍安貌魯朴始登科為滕中正壻中正子錫世寧咸笑之中正曰此人異日必顯達壽考非汝曹所及錫兄弟雖有名然終不越郎署亦無耆年者子太冲官殿中丞

董儼字望之河南洛陽人太平興國三年進士解褐大理評事通判饒州加著作佐郎五年授左拾遺直史館轉右補闕充淮南西路轉運副使會罷使就命知光州儼狂躁務進不樂外郡上書乞還京師太宗怒降為祕書丞削史館職徙知忠州復為右補闕俄復直史館會併水陸發運

爲一儼與王繼昇同領其事就轉刑部員外郎端拱初進
郎中三司度支副使坐翟馬周事左授海州團練副使移
知泰州踰年以戶部員外郎知泉州召爲京東轉運使時
三司改易制度置三計使因留拜右諫議大夫充右計使
使罷出知揚州遷右諫議大夫徙潭州轉給事中歷知廣
岳洪三州江陵府景德中歸朝會開封府繫囚二百餘人
朝議以其稽滯命儼與韓國華張雍同慮問裁決之俄判
吏部銓加工部侍郎時黃觀罷西川轉運歸闕儼與知雜
御史王濟姻家因託濟言於觀求薦已知益州未幾觀復
領陝西轉運得對便殿儼謂其必薦已他日面陳自以孤

直不爲權要所容况黃觀庸淺無操持恐爲執政所使妄
有論薦俾臣遠適惟陛下察之真宗不之詰數日王濟得
對因述儼嘗有私託且言儼性本矯詐臣語觀不可許之
真宗不欲暴其事乃出儼知青州儼復請對言爲權臣所
擯上慰遣之久而不去乃謂之曰爾自告黃觀求知益州
復有何人排斥乎儼即矍然且言觀濟嘗議益州須得臣
往彈壓之上以其詞不類因令條折以聞復遣使陝西質
問黃觀觀具述儼託王濟求薦之事且言儼素待臣非厚
初淳化中儼爲計使觀爲判官儼知觀不飲酒一日聚食
親酌以勸觀觀爲強飲之有頃都監趙贊召觀議事觀即

往賚曰飲酒耶觀以實對翌日儼與賚密奏觀嗜酒廢職
故觀因是及之乃詔樞密直學士劉綜與御史雜治之儼
方引伏坐責授山南東道節度行軍司馬不署州事大中
祥符初會赦起知郢州病疽卒年五十四儼俊辯有才幹
不學無操行所至厚納貨賂嘗令引賚更改製朱衣每夕
納儼第而潛以輕帛製衣易之在銓司命胥吏市物及請
其直則呵責之其鄙屑如此又廣畜姬媵頗事豪侈用傾
狡圖位終以是敗士大夫醜之東封恩復其官子仲容仲
宗並為太子中舍兄偉至殿中丞致仕

魏廷式字君憲大名宗城人少明法學嘗客遊趙州舍于

監軍魏咸美之廨廨有西堂素凶咸美知廷式有膽氣命居之卒無恙來京師咸美弟咸信延置館舍以同宗善待之太平興國五年中第釋褐朗州法曹掾轉運使李惟清以其吏材奏知桃源縣遷將作監丞端拱初改著作佐郎通判潁州淳化二年始命李昌齡判審刑院以廷式明練刑章奏為詳議官屢進對太宗悅其明辨遷太子左贊善大夫時初較廷臣殿最命廷式與樞密都承旨趙鎔李著同勾當三班多所規制越王生日令持禮物賜之超拜主客貲外郎判三司都勾院換河南東道判官改戶部貲外郎知利州李順為盜就命充陝西至益州路轉運使後入

奏事太宗謂曰有事當曰中書廷式曰臣三千七百里外
乘驛而至以機事上聞願取斷宸衷非為宰相來也即不
時召對問方略稱旨賜錢五十萬令還任賊平知寧州未
至召入判大理寺至道初乘傳河朔決獄復出知宋潭二
州湖南地土衍沃民喜訟產有根柢巧偽難辨者廷式立
裁之吏民咸服轉吏部員外郎知桂州歷工部郎中真宗
即位改刑部會王繼恩有罪下吏命廷式同按之踰宿而
獄具俄知審官院通進銀臺封駁司拜右諫議大夫知審
刑院出知涇州咸平二年卒年四十九錄其子攝太常寺
太祝舜卿為太祝禹卿同學究出身廷式所至以嚴明稱

剛果敢言爲人主厚遇然性傾險喜中傷人士君子憚其口而鄙其行

盧琰字錫圭淄州淄川人父浚右諫議大夫琰太平興國八年進士舉解褐歷城主簿歷大理評事知安吉縣三遷太常丞通判并州至道中就加太常博士咸平二年選爲開封府判官與推官李防並命真宗謂宰相曰人之有材難得盡知但歷試而後可見占謝日特升殿諭以天府事繁慎選之意仍賜緡錢會獄空有詔獎之遷工部員外郎爲河北轉運副使時北鄙未寧調發軍儲糧道不絕以職務修舉召入遷秩刑部賜金紫復遣之任會城祁州命專

董其役契丹入邊車駕幸澶州琰自定州隨軍至大名即單騎赴行在召對勞問久之其子士宗時爲隰州推官特遷大理寺丞契丹請和琰上言領職六年求歸闕許之以使勞優拜吏部員外郎判三司三勾院會宋搏使契丹命權戶部副使時議東封又權京東轉運使往營頓置加戶部郎中復判三勾院大中祥符二年以本官兼侍御史知雜事數月授三司度支副使祀汾陰歲命與鮑中和同判留守司三司加吏部郎中俄拜右諫議大夫知永興軍府五年再爲河北轉運使琰勤於吏職所至以幹集聞頗知命嘗語親舊曰官五品服三品天不與者壽爾明年被疾

詔遣中使將太醫診視六年卒年五十九時琰母八十餘無恙上憫之以士宗爲太常博士特命知懷州又以次子祕書丞士倫爲太常博士給祿終喪士倫至工部郎中度支副使士宗自有傳

宋搏字鵬舉萊州掖人治毛氏詩開寶八年宋準典貢部得第調補遂寧尉歷濰州司理參軍改白龍令膳部員外郎鞠礪薦其能遷右贊善大夫知利豐監徙知藤州改殿中丞通判洪州復有薦者召還命提點河北西路刑獄未行改監左藏庫遷國子博士通判西京留守司得對便坐賜錢三十萬久之徙江南轉運使就遷度支員外郎真宗

嗣位遷司封員外郎河東轉運使上言大通監冶鐵盈積
可備諸州軍數十年鼓鑄願權罷採以紓民又請科諸州
丁壯爲兵以增戎備在任凡十一年河東接西北境時邊
事未息屯師甚廣搏經制漕運以幹治稱連他徙州郡輒
乞留有詔褒飭兩至夏州界部發居民數詣闕奏事稱旨
屢以秩滿請代朝議以搏善職就加祠部郎中賜金紫嘗
薦代州承受使臣王白上以本置此職止於視軍政察邊
事搏不應保奏因詔諸路自今勿得舉承受使臣景德四
年入判三司勾院踰月爲戶部副使大中祥符初進秩刑
部郎中俄使契丹會疾契丹主以車迎之二年卒年六十

六子可法至太子中舍舜元登進士第擢卒舜元自筠州判官改著作佐郎又賜其孫出身

凌策字子奇宣州涇人世給事州縣策幼孤獨厲志好學宗族初不加禮因決意渡江與姚鉉同學於廬州雍熙二年舉進士起家廣安軍判官改西川節度推官以彊幹聞淳化三年就命爲光祿寺丞簽書兩使判官代還拜左贊善大夫通判定州賜朱衣銀章御書曆給以實奉李順之亂川陝選官多憚行策自陳三粒蜀境諳其民俗即命知蜀州又以巴西當益之饘道徙綿州加太常博士還朝會命爲廣南西路轉運使進屯田員外郎入爲戶部判官遷

都官先是嶺南輸香藥以郵置卒萬人分鋪二百負擔抵京師且以煩役爲患詔策規制之策請陸運至南安汎舟而北止役卒八百大省轉送之費盧之翰任廣州無廉稱以策有幹名拜職方員外郎直史館命代之賜金紫廣英路自吉河趣板步二百里當盛夏時瘴起行旅死者十八九策請由英州大源洞伐山開道直抵曲江人以為便代還知青州東封以供億之勤超拜都官郎中入判三司三勾院出知揚州屬江淮歲儉頗有盜賊以策領淮南東路安撫使駕旋使停進秩司封時洪州水知州李玄病上與宰相歷選朝士將徙策代之上曰南昌水潦艱殆長吏當

便宜從事不必稟於外計也王旦言策泣事和平可寄方面望即以江南轉運使授之仍詔諭差選之意饒州產金嘗禁商市鬻或有論告逮繫滿獄策請縱民販市官責其筭人甚便之五年召拜右諫議大夫集賢殿學士知益州初策登第夢人以六印加劔上遺之其後往劔外凡六任時以爲異策勤吏職處事精審所至有治迹九年自蜀代還上頗有意擢用會己病命知通進銀臺司兼門下封駁事糾察在京刑獄真宗嘗對王旦言策有才有治蜀敏而有斷旦曰策性淳質和臨事彊濟上深然之是秋拜給事中權御史中丞時權茶之法弊甚詔與翰林學士李迪知

雜御史呂夷簡同議經制稍寬其舊明年疾甚不能朝謁
累遣中使挾醫存問賜名藥復表求典益尋遷工部侍郎
從其請天禧二年三月卒年六十二錄其子將作監主簿
瓘琬並為奉禮郎續給其奉策兄簡官國子博士分司南
京

楊覃字申錫漢太尉震之後唐有京兆尹憑居履道坊僕
射於陵居新昌坊刑部尚書汝士居靖恭坊時稱三楊皆
為盛門而靖恭尤著汝士弟虞卿漢公魯士皆顯名虞卿
至工部侍郎京兆尹生堪為太子少師堪生承休昭宗朝
以兵部員外郎使吳越會揚行密據淮甸絕其歸路因留

浙中承休生巖即覃祖也署為鎮海軍節度副使奏領春
州刺史巖生郁早卒覃少獻書於嗣王俶俶私署著作佐
郎從俶歸朝為禹城尉太平興國八年舉進士擢第授徐
州觀察推官改著作佐郎知戎州再遷太常博士使陝西
蠲逋負覃本名蟬至是太宗為改焉淳化中轉屯田員外
郎同判壽州巡撫使潘慎修上其政績有詔嘉獎就命知
州事數月召還未上道會丁內艱州民列狀乞留轉運使
以聞有詔奪情時田重進為求興節度選覃與林特同判
軍府事賜覃緋魚仍賜御書曆給以實奉重進不法覃事
多抗執重進頗不悅形於辭色覃表求徙任不許就轉都

官負外郎時討李繼遷調發芻糧覃特皆以苛急促辦爲
務覃令鉗手特令即械頸雖衣冠舊族不免人用怨嗟改
職方負外郎咸平初遷屯田郎中三門發運使呂蒙正在
河南薦其材詔入判三司磨勘憑由理欠司四年春旱覃
上言古之用刑皆避三統之月漢舊章斷獄報重盡三冬
之月又唐太宗凡斷重刑日勅減膳徹樂今春物方盛時
兩尚愆輦轂之下獄係甚繁望詔有司死罪未得論決俟
兩降乃復常典仍望自今凡決重刑日依唐故事以彰至
仁之德嘗獻時務策五篇一曰禦戎二曰用兵三曰爲政
四曰選賢五曰刑罰文多不載明年權同知貢舉出爲陝

西轉運使賜金紫會邊臣言繼遷死願乘此時深入致討
覃建議伐喪非禮且其子尚在當為之備請詔邊臣謹守
疆候毋得輕舉俟其衆叛親離則亡無日矣時西鄙屯兵
調役甚繁副使朱台符務有為而覃務循舊且言邊事不
宜更張初寇準知青州台符為通判至是準作相覃意台
符憑恃僚舊密以上聞坐不協徙知隨州王超節制漢東
覃移唐州景德二年召歸屬河北兵革之後命覃詣澶濱
棣德博州巡撫振給之出知潭州王師討宜賊軍須多出
長沙曹利用以聞詔書褒勞加刑部郎中大中祥符二年
代馮亮為淮南江浙荆湖制置發運使月餘改太常少卿

直昭文館知廣州覃勤於吏事所至以幹濟稱南海有蕃
舶之利前後牧守或致謗議惟覃以廉著遠人便之加右
諫議大夫四年卒年五十四遣其長子奉禮郎文友乘傳
赴喪詔本州護柩還其家官給所費錄其次子文敏爲揚
州司士參軍覃從弟蛻及從子侃傳並登進士第蛻官司
封負外郎侃後名大雅自有傳

陳世卿字光遠南劍人雍熙二年登進士第解褐衡州推
官再調東川節度推官會李順寇兩川知州張雍以州兵
馬爲數部使官分領世卿素善射當城一面親射中數百
人賊寢盛同幕皆謀圖全計世卿正色曰食君祿當委身

報國奈何欲避難爲他圖耶亟出白雍曰此徒皆懦儒存之適足惑衆不若遣出求援雍從之賊既引去世卿適丁外艱雍表其材詔追出視事就改掌書記凡七年歸朝爲祕書郎遷太常丞知新安縣或薦其堪任臺憲即召歸會張鑑出知廣州表爲通判將行召見賜緋加太常博士景德初徙知建州真宗知其材幹逾月授福建轉運使規畫南劍州安仁等銀場歲增課羨詔獎之俄代姚鉉爲兩浙路轉運使歷祠部員外郎判三司三勾院大中祥符四年改度支員外郎出爲荆湖北路轉運使屬澧州慈利縣下溪等四州蠻人侵縣境地四百餘里朝命世卿與閤門祗

候史方知澧州劉仁霸同領兵討之遂還所侵地標正經
界取其要領又令納所掠漢口千餘復置澧川武口等砦
以控制之自是平定有詔嘉獎還朝屢述溪洞利害召對
真宗器其材復自言願効用於煩劇會邵曄知廣州被疾
乃授世卿祕書少監代之加賜金紫郡有計口買鹽之制
人多不便至即奏除之九年卒年六十四錄其子南安主
簿儼為太祝

李若拙字藏用京兆萬年人父光贊貝冀觀察判官若拙
初以蔭補太廟齋郎復舉拔萃授大名府戶曹參軍時符
彥卿在鎮光贊居幕下若拙得以就養俄又舉進士王祐

典貢舉擢上第授密州防禦推官登賢良方正直言極諫科太祖嘉其敏贍改著作佐郎故事制策中選者除拾遺補闕若拙以恩例不及上書自陳執政惡之出監商州阬治遷太子左贊善大夫以官稱與父名同辭不許太平興國二年知乾州會李飛雄詐乘驛稱詔使事敗伏法太宗以若拙與飛雄父若愚連名疑其昆弟命殿直盧令珣即捕繫州獄乃與若愚同宗通家非親不知其謀猶坐削籍流海島歲餘起授衛尉寺丞知隴州四年復舊官以政聞超授監察御史通判泰州同帥宋偓年老政弛又徙若拙通判焉未幾御史中丞滕中正薦之召歸臺頃之改右補

闕時諸王出閣若拙獻頌稱旨召見賜緋魚同勾當河東
轉運兼雲應等八州事嘗詣闕言邊事太宗嘉之又同掌
水陸發運司雍熙三年假秘書監使交州先是黎桓制度
踰僭若拙既入境即遣左右戒以臣禮繇是桓聽命拜詔
盡恭燕饗日以奇貨異物列于前若拙一不留眄取先陷
蠻使鄧君辯以歸禮幣外不受其私覲使還上謂其不辱
命遷起居舍人充鹽鐵判官淳化二年出為兩浙轉運使
契丹寇邊改職方員外郎徙河北路賜金紫五年直昭文
館遷主客郎中江南轉運使若拙質狀魁偉尚氣有幹才
然臨事太緩宰相以為言罷使知涇州至道二年黎桓復

侵南鄙又詔若拙充使至則桓復稟命使還真宗嗣位召見慰問進秩金部郎中召試學士院改兵部郎中充史館修撰俄知制誥咸平初同知貢舉被疾改右諫議大夫車駕北巡判留司御史臺明年使河朔按邊事知昇貝二州四年卒年五十八子繹

繹字縱之幼謹愿自修初以父使交趾有勞補太廟齋郎改太常寺太祝舉進士中第除將作監丞累遷尚書屯田負外郎知華州蒲城民李蘊訴人盜其從子亡去繹問曰若有仇耶曰無有曰有失亡邪曰無有繹揮蘊去因密刺蘊蘊有陰罪姪覺之懼事暴殺之以滅口遂收蘊致法擢

提點河北刑獄權知貝州歲旱繹爲酒務市民薪草溢常
數餓者皆以樵採自給得不死官入亦數倍邊民歲輸防
城火牛草十餘萬委積久輒腐敗繹奏罷之三遷本曹郎
中爲利州路轉運使河北經費不支仁宗問誰可任者參
知政事薛奎薦繹遂徙河北進刑部郎中直史館知延州
改兵部爲江淮制置發運使內出絹五十萬匹責買於東
南繹曰百姓飢不宜重擾輒奏罷之甫半年漕課視常歲
增五之一遷太常少卿再知延州繹所至頗稱治自以久
宦在外意不自得作五知先生傳謂知時知難知命知退
知足也嘗兩知鳳翔府至是又徙鳳翔尋爲右諫議大夫

卒

陳知微字希顏高郵人咸平五年進士甲科解褐將作監
丞通判歙州擢爲著作佐郎直史館俄充三司戶部判官
奉使契丹遷太常博士判三司都磨勘司再爲戶部判官
出爲京東轉運副使奏還東平監所侵民田六百八十家
又決古廣濟河通運路罷夾黃河歲減夫役數萬計遷右
司諫徙荆湖南路轉運使召還拜比部員外郎知制誥淮
南饑遣知微巡撫所至按視儲糧察諸官吏能否使還判
吏部銓兼刑部知微詞藻雖無竒采而平雅適用一日進
改羣官除目紛委適當知微次直思亦敏速又判司農寺

糾察在京刑獄天禧二年加玉清昭應宮判官俄以疾聞
真宗遣中貴挾太醫往視之卒年五十錄其子舜卿爲太
常寺奉禮郎給奉終喪又假官船載其柩還鄉里知微儀
狀甚偉沉厚有材幹不務暟察時人許其處劇惜其母老
不克終養有集三十卷子堯卿大中祥符五年進士及第
論曰維岳明習吏事才足以治劇而能曲全法掾其仁恕
藹然雍雖素稱鄙吝而勤恪清幹觀其捍守亦可見矣儼
務進瀆貨廷式傾險忌刻自不容於清議若琰搏經制漕
運有方策之處事精詳治迹昭著覃之律身廉潔兼勤吏
事世卿之安遠若拙之專對皆爲時論所許繹以謹愿克

世其家知微敦實有材幹不辱其職亦可尚也至若王陟
以謹幹稱而取士以謗致汗惜哉

蘇道實貴後左射劍法隊目不寒外前精去廷射然歸曹

蕭然環裝素無輪吝而禮外前精去廷射然歸曹

論曰雖古明皆吏事未及以武備而謂由全去射其以

列傳卷第六十六卷于其卿大中射者正平進士又

知其善武射亦材幹不辱其職亦可尚也至若王陟

常寺奉對暇餘奉慈養又射官議薄其射器職里味始建

真宗臺中貴射大醫出射之卒年五十餘年于其卿為大

除發去京師射天爵二年味中射器惠官供官射以表開

列傳卷第六十七

宋史三百八

開府儀同三司上柱國魯國重壽前書君丞相齊國領經筵事都總裁臣脫脫等奉

敕修

上官正

盧斌

周審玉

裴濟

李繼宣

張旦

張煦

張佶

上官正字常清開封人少舉三傳後為鄜州攝官雍熙中
召授殿前承旨屢遣鞠獄遷供奉官閣門祗候天雄監軍
淳化中轉作坊副使劔門都監李順之亂分其黨趨劔門
時疲兵數百人正奮勵士氣以禦之會成都監軍宿翰領
兵投劔門與正兵合因迎擊大破賊數千衆斬馘殆盡奏

至太宗嘉之詔書獎飭並賜襲衣金帶超正爲六宅使劍
州刺史充劍門部署翰自供奉官擢崇儀使領昭州刺史
數月正被疾請尋醫至闕疾愈入對上勞問久之復遣還
任所賜以金丹良藥衣帶白金千兩馬三匹授以方略令
招撫殘孽慰勉遣之初川賊甚盛朝議深以棧路爲憂正
以孤軍力戰挫賊鋒自是閣道無壅王師得以長驅而入
賊衆三百餘敗歸成都順怒其驚衆盡斬之然自此沮氣
矣後賊旣誅餘寇匿山谷恃險結集剽劫爲患王繼恩百
計召誘不至正諭以朝廷恩信皆相率出降未幾加峰州
團練使與雷有終並爲西川招安使代王繼恩正本彊好

凌人自謂平賊有勞受人主知無所顧忌數面攻兩川官
吏之短而暴揚之衆積怨怒多上章訴其不法者太宗謂
近臣曰人臣可任用者朕常欲保全正姪直而失於謙和
每謗書至朕雖力與明辯然衆怒難犯恐其不能自全乃
賜手札戒諭曰言者君子之樞機樞機之發榮辱之主不
可不慎也夫遇事輒發悔不可及儻自恃無瑕而好面攻
人之短豈謂喜怒不形於色耶當以和輯遠民爲念斯盡
善矣正上表謝真宗即位改莊宅使是秋廣武叛卒劉旰
嘯聚數千輩逐都巡檢使韓景祐略漢蜀邛州懷安永康
軍正與鈐轄馬知節領兵趨新津抵方井擊敗之斬旰平

其黨遷南作坊使賜錦袍金帶咸平初召還擢拜東上閤門使勾當軍頭引見司俄權戶部使二年出知滄州徙高陽關副都部署真拜洺州團練使車駕北巡以爲行營先鋒鈐轄尋知青州未行會王均叛蜀命爲峽路都鈐轄移知梓州又歷滄瀛鎮貝四州高陽關部署以足疾求知磁州手詔慰勉會邢州地震民居不安徙正典之移潞州景德中以河北新經兵革慎擇守臣以正知貝州遷洺州防禦使復知滄州移同州再表引年授左龍武軍大將軍平州防禦使分司西京尋以本官致仕賜全奉仍以見緡給之四年卒年七十五子璪至內殿崇班

盧斌開封人以筆札事晉邸太宗即位補殿直雍熙中領
兵屯霸州會大舉北伐令以五千騎隨曹彬抵祁溝時契
丹據河王師乏水斌請以千弩斫砦契丹遁去遂移軍夾
河旣克涿州令斌以萬人戍守會食盡大兵將還斌因懇
言涿州深在北境外無援兵內無資糧丁籍殘失守之無
利今若還師必須結陣而去以一陣之役比於固守其利
百矣復慮遼人乘便剽襲宜爲之備彬以爲然遂令斌擁
城中老幼並狼山南還易州彬之旋也無復行伍果爲契
丹所乘諸將皆以失律被譴斌亦下樞密院問狀太宗聞
其嘗建議棄涿州遂釋不問以爲霸州破虜軍緣邊巡檢

端拱中又爲永興軍華州巡檢時大賊侯和尚劉渥劫興平櫟陽殺捕賊官二人斌率兵掩襲且追且鬪薄南山渡渭水抵鳳翔復至耀州擒斬並盡以勞改供奉官召還面加獎勵授閤門祗候又賜白金緡錢衣帶尋爲梓遂十二州都巡檢使太宗諭之曰川峽人情易搖設有寇攘雖他境亦當襲逐仍許便宜從事不須中覆淳化二年賊任誘等寇昌合州斌率兵頓昌州南牛鬪山偵知賊在龍水鎮值大雨斌馳馬四十里騎從數十人遂斬誘等百餘級賊衆悉平三年富順監蠻掠榮州斌晨夜倍道以赴得州兵千人署隨軍糧料以張其勢蠻乃遁追至地頭鎮東南八

十里樹柵招其酋甫羌一阿奴綱諭以朝旨歃血刻石爲盟而遣之俄而榮戎資州富順監賊十五隊鈔鄉邑斌擒三百人部送闕下餘悉臨敵斬戮四年賊王盡復起榮資斌擊滅之盡縛以獻遷內殿崇班是冬李順爲亂斌即率兵六百抵成都鬪戰連月殺數萬人明年成都守斌還梓州集十州兵赴援知州張雍委以監護之任會江水汎溢毀子城斌勸諭州民翌日畚鍤大集自城西大濠中掘塹深丈決西河水注之以環城二月賊渠相里貴衆二十萬傳城下城中兵裁三千斌曰軍法倍兵不戰然狂醜烏合非訓練之師以吾仗天子威靈必可殲蕩即感厲士

伍負土塞南北門爲固守之計又突出與賊戰擊刺三十餘合賊稍却俄復大設機石連弩衝車雲梯四面鼓譟乘城矢石亂下斌與州將隨機設備長圍八十日會王繼恩令石知顯率兵來援斌出東門迎勞王師賊不戰而潰斌乘勝追斬及納降二萬餘五月賊數萬圍閬州斌領千兵赴之斬首五千圍遂解又至蓬州老鷓山賊衆三千爲陣拒斌斌擊敗之至城下賊復大集斬三千級蓬州平斌傳詔安撫蓬閬渠達四州擢授西京作坊使領誠州刺史斌在川峽六年以孤軍禦寇累立戰功表求入奏太宗遣使諭之曰俟妖孽盡殄當召汝旣而賊黨集梓絲漢三州境

上斌徃平之未幾代還太宗親加勞問拜東上閣門使檢
校左僕射加食邑三百戶賜白金千兩袍笏金帶上言葭
萌路出師討賊可直入利州若寇焚棧道劔門之險不足
固也請置砦柵從之尋命爲銀夏兵馬鈐轄遣與李繼隆
等五路出師討李繼遷斌求對懇言曰羌夷之族馬驕兵
悍往來無定敗則走他境疾戰沙漠非天兵所利不若堅
保靈州於內地多積芻糧以師援送苟其至也會兵首尾
擊之庶幾無枉費而不失固圍之策矣時業已出師不從
其議改授靈環路鈐轄領兵二萬爲前鋒令於烏白池與
諸軍會斌謂李繼隆曰靈州抵烏白池月餘方至若自環

州橐駝路裁十日程即不俟詔而往與諸將失期不見賊而還俄徙屯寧州以疾召歸勾當軍頭引見司咸平初卒年五十子文質殿中丞

周審玉開封人父勲以親校事唐明宗累立戰功太平興國中至隰州圍練使周顯德初審玉蔭補殿直從世宗平瓦橋關甚見親信太祖受禪爲供奉官未幾加閤門祗候累遷崇儀洛苑副使西京作坊使雍熙中契丹犯塞潘美屯師定州審玉爲監軍嘗與敵戰而先鋒劉緒陷賊審玉躍馬趣擊拔緒而還以勇敢聞淳化中知貝州有驍捷卒戍州者三十七人同謀殺審玉劫庫兵而叛推虞候趙咸

雍爲首審玉覺之與轉運使王嗣宗率兵悉擒其黨斬十
五級磔咸雍於市先是咸雍父鱗晉天福中嘗誘契丹屠
州城至是五十年而其子戮於都市舊老猶記其事咸異
之審玉以功領順州刺史至道初徙并州鈐轄咸平初知
鳳翔府有桑門乘傳而西以市木爲名咸動府縣審玉曰
此有所倚而爲也因按詰之盡得其姦狀杖其背械送闕
下以目疾代還奉朝請俄丁內艱旣而謂親友曰僕齒髮
遲暮而未能辭祿仕者良以慰母心爾今可行其志矣乃
拜章請老得千牛衛大將軍致仕三年卒年七十四審玉
晚年好讀神農本草留意方術少長兵間習知攻守之法

真宗嘗召至便坐示以攻戰器方奏對疾作詔遣使就第
賜白金慰恤之子允迪爲虞部員外郎

裴濟字仲溥絳州聞喜人唐相耀卿八世孫後徙家河中
濟少事晉邸同輩有收悍者濟屢糾其過失被譖出補太
康鎮將未幾譖濟者坐法太宗知濟可任會即位補殿直爲
天威軍兵馬監押及平太原征幽薊濟迎謁陪扈令監軍
易州契丹攻城不能下以勞遷西頭供奉官太平興國末
江表盜起命爲巡檢遷崇儀副使召還遷崇儀使監戍兵
於威虜軍途次鎮州夜有賊騎扣城門大呼曰官軍至矣
州將然之促守吏開關濟遽止之曰此必妄也及旦果有

敵兵遯去太宗嘉之遷西上閣門使定州都監就加行營
鈐轄尋知定州契丹三萬騎來攻濟逆擊於徐河斬數千
級獲牛馬鎧仗甚衆淳化初與周瑩同判四方館未幾爲
鎮州行營鈐轄又與李繼隆擊賊於唐河濟短兵陷陣賊
大敗走優詔褒美初繼隆以濟性剛不悅之及是役撫濟
恨相知之晚改四方館使復知定州徙天雄軍鈐轄遷客
省使復知定州至道二年改內客省使知鎮州立春日出
土牛以祭酌奠始畢有卒挾牛去濟察其舉止知欲爲變
亟命擒之果有竊發者數十人已刼壓閉矣悉蒐捕腰斬
之軍民肅然濟在鎮定凡十五年威績甚著召還知天雄

四十九
軍咸平初李繼遷叛以濟領順州團練使知靈州兼都部
署至州二年謀緝八鎮興屯田之利民甚賴之其年清遠
軍陷夏人大集斷饗道孤軍絕援濟刺指血染奏求救甚
急兵不至城陷死之上聞嗟悼特贈鎮江軍節度三子並
優進秩濟在諸使中甚有聲望及沒夏人皆惜之景德中
濟妻永泰郡君景氏卒特詔追封平陽郡夫人諸子給奉
終喪子德谷虞部郎中德基至如京使德豐殿中丞濟兄
麗澤弟麗正並進士及第麗澤至右補闕麗正至金部員
外郎麗正子德輿爲殿中丞

李繼宣開封浚儀人乾德中補右班殿直令與御帶更直

裁十七歲嘗命往陝州捕虎殺二十餘生致二虎一豹以
獻太平興國初掌南作坊使改供奉官出爲邠寧慶三州
巡檢都監繼宣本名繼隆與明德皇后兄同姓名至是太
宗爲改焉五年召還承受定州路奏事奉詔修長城口平
塞威虜靜戎軍保州又領兵入敵境獲老幼千餘牛畜數
百又率兵扞契丹于乾寧泥姑海口契丹寇靜戎軍從崔
彥進過拒馬河接戰自午至申大敗之又爲貝州監軍雍
熙三年曹彬北征繼宣從先鋒李繼隆至方城力戰三日
大軍繼至遂克固州進壁涿州東又與敵鬪乘勝攻北門
克之日領輕騎度涿河覘敵勢又將五千騎援米信因率

勁騎追至新城北大敗之斬其首賀恩相公繼宣亦中流矢大軍還雄州取芻糧遇契丹新城疾戰至暮繼宣中十創劒及堦鏊明日復戰繼隆爲敵所邀繼宣以所部拔之且戰且行奪涿河數日乃至涿州及棄州保歧溝關又戰拒馬上追奔至孤山契丹乃引去留屯滿城俄還貝州召入以功超授崇儀使代王繼恩爲易州駐泊都監賜錢五十萬白金五百兩又領騎兵五千戍北平押大陣東偏受田重進節度屯長城口敵至大溝繼宣進滿城敵至定州奪唐河橋重進召繼宣泊田紹斌赴援紹斌爲敵所敗繼宣獨按部轉鬪入定州敵兵北去重進命將五千騎躡其

後抵拒馬河及敵據楊疇繼宣徑掩擊之遂焚廬舍而遁
雍熙四年爲高陽關行營都監端拱初契丹騎至瀛鎮繼
宣率步騎萬人入敵境抵勝務焚聚落獲告口契丹乃引
還時易州候騎不至繼宣於易州平塞軍長城口威虜靜
戎順安軍至高陽爲望櫓七所舉烽以候警急二年爲鎮
定高陽關三路排陣都監押大陣西偏與李繼隆部芻糧
抵威虜還度徐河爲敵追襲繼宣駐軍與鬪殺獲甚衆又
領騎二千敗契丹於保州西射城追薄西山有詔褒美薄
化三年徙知保州又轉莊宅使築關城浚外濠葺營寨
五百區造船二百艘入雞距泉以運糧人咸便之數月徙

定州行營都監成深州改高陽關行營都監課軍中勁弩
爲入陣之備五年領高州刺史會契丹泛海劫千乘縣繼
宣請於海口置砦以禦之至道三年遷北作坊使俄召還
加南作坊使出爲鎮州行營鈐轄契丹寇定州命主無地
分馬敵至懷德橋繼宣領兵三千掩襲之至則契丹已壞
橋繼宣橫木而度追奔五十餘里契丹焚鎮州中渡常山
二橋繼宣領兵趣之契丹保豐隆山砦繼宣伐木治常山
橋契丹聞之大懼拔砦遁走繼宣銳於追襲傳潛爲部署
繼宣詣潛請行頗爲所抑及召潛屬吏詔繼宣與高瓊同
主軍事逐敵越拒馬河復爲鎮州鈐轄受詔按視緣邊城

砦權知威虜軍敵騎至城下屢出兵設伏斬獲甚衆俄還
鎮州咸平四年拜西上閣門使領康州刺史爲前陣鈐轄
與秦翰楊延昭楊嗣分屯靜戎威虜敵至會師于威虜延
昭嗣輕騎先赴羊山繼宣與翰分左右隊各整所部翰全
軍亦往繼宣留壁赤虜止以二騎繼進至則延昭嗣適爲
敵所乘繼宣即召赤虜之師與翰師合勢大戰敵走上羊
山繼宣逐之環山麓至其陰繼宣馬連中矢斃凡三易騎
進至牟山谷大克捷延昭嗣翰之師初頓赤虜旣而退保
威虜繼宣以所部獨與敵角薄暮始至威虜詔書稱獎特
加檢校官及食邑明年徙定州鈐轄扞契丹于唐河會緣

邊都巡檢使楊延昭楊嗣德敵師敗詔繼宣與內殿崇班
王汀代之望都之敗敵騎剽郡縣繼宣壁徐河契丹數十
隊薄威虜威虜魏能與戰走之久而繼宣始至又寇靜戎
汀請分兵自將襲契丹繼宣拒之雖日出遊騎偵敵勢屢
徙若而未嘗出戰爲能汀所發召還令樞密院問狀降爲
如京副使景德初加如京使鎮州鈐轄契丹乘秋來攻時
桑贊病足鄭誠赴定州繼宣獨主鎮州全師歷屯邢趙及
與契丹和命爲高陽關鈐轄是冬復爲西上閤門使領康
州刺史三年兼知瀛州繼宣罕識字上以河間郡事繁慮
獄訟有枉命高繼勳代之止爲鈐轄大中祥符初徙鎮定

兩路鈐轄進秩東上閣門使召還改鄆州部署加四方館使以疾授西京水南都巡檢使每夕罕巡警爲留司所舉特詔增巡檢一員專主夜巡六年疾甚求至京師尋醫卒年六十四子守忠左侍禁閣門祗候

張旦趙州人勇敢善射以經學中第至國子博士淳化中知陵州時李順構亂連下城邑賊黨數萬攻陵州州兵不滿三百舊不設城塹旦修完戰具置鹿角砦驅市人進戰大敗之殺五千餘人獲器械萬計詔書褒之特遷水部員外郎賜緋魚由是知名數月西川招安使上官正言雅州密邇蠻蠻在於鎮撫須得其人伏見水部員外郎張旦前

守陵州以孤軍抗羣寇保全壁壘至今劍外伏其威名望
改授諸司使令知州事上以省郎之重不欲換他職乃授
刑部員外郎賜金紫乘傳之任寇不敢犯真宗即位遷兵
部員外郎改尚食使知德清軍景德中契丹入寇陷軍壁
且與其子利涉率衆奮擊並戰沒上聞之驚悼特贈左衛
大將軍深州團練使利涉崇儀副使錄其四子官時有上封
事者言朝廷宜優加恩典以勸忠臣詔以恤且事告諭天
下又虎翼都虞候胡福成軍城率兵力戰金創徧體猶奮
劍轉鬪矢無虛發麾下已盡獨挺刃殺數十人副指揮使
尚祚能運大櫓所斬首拉脅者亦百餘人衆寡不敵遂與

指揮使張睿劉福都頭輔能等四人並死之真宗嘉歎其忠勇遣使訪遺骸唯得福尸命其子厚葬之贈福洺州團練使祚濱州刺史睿濱州刺史劉福臨州刺史能等並爲諸衛率府副率又邯鄲令李晦辭赴任值道梗留德清同拒敵侍禁夏承皓部兵至大名界遇敵皆戰沒贈晦辭工部員外郎承皓崇儀使時又贈受事河朔而沒者殿直劉超供備庫使入內高班內品李知順爲六宅副使奉職胡度等三人爲內殿崇班仍各錄其子及賜其家金帛

張煦字輔暘開封人開寶末補府中牙職雍熙二年自陳太宗尹京嘗事左右命爲殿前承旨遷殿直欵州監軍亮

人黃行達第坐法抵死行達誣州將故入其罪詔宣州通判姚鉉與煦鞠之即日決遣還擢供奉官閤門祗候占謝日又改內殿崇班鎮定邢趙山西土門路都巡檢使契丹騎兵剽境上煦以所部斬首數十走之葛霸周瑩李繼宣稱其幹舉有詔嘉獎代還拜供備庫副使權知環州數月改寄嵐軍使又知保安軍咸平中王均亂蜀以煦爲綿漢劔門路都巡檢使又與雷有終進攻成都煦主東砦焚其邠及樓堞均突圍而遁賊平以功就遷正使徙益州都監與知州宋太初同提總本路諸軍事有戰艦卒將謀擾動煦即日斬之夏人寇邊改涇原儀渭都鈐轄又爲邠寧環

慶路鈐轄兼巡檢安撫都監累躡寇入賊中掩殺甚衆有
詔嘉獎會遣王超張凝秦翰援靈武命煦爲西路行營都
監至鎮戎聞靈武已陷復還本任與張凝入西夏境出白
豹鎮至柔遠川夏人七百餘邀戰煦與慶州監軍張綸擊
殺甚衆清遠故城有酋長請以甲騎三萬來降煦語凝曰
此詐也亟嚴兵以待之果然凝按部歸環州道爲敵所邀
煦聞之領所部銳兵自慶州赴之一昔與凝會射殺其大
將與凝同還景德元年加領賀州刺史復爲涇原儀渭鎮
戎軍鈐轄再知環州四年宜州戍卒陳進反命副曹利用
爲廣東西路安撫使賊衆擁判官宜州盧均僭號南平王

圍象州煦以兵會利用斬之初與利用同署紙人持百枚
備給立功將士及破賊利用在前軍無所給煦在後而所
給過半真宗謂其太過賊平改如京使知懷州東封歲權
河陽鈐轄遷文思使知曹州會江淮災歉分命大藩長吏
綏撫以煦爲江南西路安撫都監俄還濟陰加北作坊使
又徙滄州就轉宮苑使領康州刺史大中祥符九年加領
昭州團練使知鄜州未幾復知滄州天禧三年拜西上閤
門使徙并代鈐轄以老疾求近郡得知磁州四年卒年七
十三煦明術數善相宅時稱其妙

張佶字仲雅本燕人後徙華州渭南初名志言後改焉父

昉殿中少監佶少有志節始用蔭補殿前承旨以習儒業
獻文求試換國子監丞遷著作佐郎監三白渠知涇陽縣
端拱初爲太子右贊善大夫曹州民有被誣殺人者詔往
按之發摘姦伏寃人得雪尋通判忻州遷殿中丞兼御河
督運至道中通判陝州再部送芻糧赴靈武就改國子博
士咸平初擢爲陝西轉運副使賜緋魚至延安遇夏人入
寇親督兵擊敗之三年徙西川轉運副使時詔討王均以
餽餉之勞遷虞部員外郎賊平分川峽爲四路以佶爲利
州路轉運使有薦其武幹者召還授如京使涇原鈐轄兼
知鎮戎軍徙麟府路鈐轄夏人來寇佶率兵與戰親射殺

酋帥俘獲甚衆餘黨遁去詔書褒之賜錦袍金帶景德中徙益州鈐轄加宜州刺史遷文思使佶御軍撫民甚有威惠蜀人久猶懷之大中祥符四年車駕祀汾陰以爲西京舊城巡檢鈐轄禮成加授北作坊使充趙德明官告使又爲鄜延鈐轄會秦州李濬暴卒上語近臣曰天水邊要宜速得人馬知節稱佶可任上然之遂改左騏驎使就命知秦州至州置四門砦開拓疆境邊部頗怨又臨渭置采木場戎人不之爭移帳而去佶不甚存撫亦不奏加賚賜邊人追悔引衆劫掠佶深入掩擊敗走之議者又欲加恩宗哥立遵等族以扼平夏佶請拒絕之事具吐蕃傳朝廷始

務寧邊以佶輕信易事徙邠寧路鈐轄天禧初召爲契丹
國信副使再任邠寧兼知邠州遷宮苑使未逾月擢拜西
上閣門使復爲涇原鈐轄四年卒年六十九佶涉獵書史
好吟詠勇敢善射有方略其總戎護塞以威名自任子宗
象兵部員外郎直史館度支判官

論曰自古盛德之世未嘗無邊圉之患要在得果毅之臣
以扞禦之昔人有言誰能去兵漢祖亦云安得猛士蓋爲
此也李順叛蜀攻陷郡邑正扞劍門斌守梓潼其績最多
契丹入寇審玉繼宣拔陷將於重圍之中固有餘勇佶煦
宣力西南勤幹威惠亦皆可取濟旦以孤城扞強寇援絕

戰死一代死事之表表者其可泯諸



列傳卷第六十七

Faint vertical text columns, likely bleed-through from the reverse side of the page, containing names and biographical details.

列傳卷第六十八

宋史三百九

開儀司上樞錄國重事前事君丞相修國史領經筵事都總裁脫等奉

勅修

王延德

常延信

程德玄

王延德

魏震

張質

楊允恭

秦羲

謝德權

閻日新

靳懷德

王延德開封東明人曾祖芝濮陽令祖璋相州錄事

參軍父温晉末契丹内寇温率鄉豪捍蔽境内里人

德之宣祖掌畿甸兵與温厚善延德方總角宣祖愛

其謹重召置左右太宗尹京署爲親校專主庖膳尤
被倚信太平興國初授御厨副使數月遷正使從征
太原未幾加尚食使賜浚儀縣壽昌坊宅一區俄領
薊州刺史兼掌武德司改皇城使掌御輦院左藏庫
延德所領凡五印因對懇讓遂罷左藏御厨八年兼
充親王諸宮使延德素謹慎以舊恩每延訪外事端
拱初領本州團練使淳化中當進秩延德與王繼恩
杜彥鈞使額已極特置昭宣使以延德等爲之至道
二年加領平州防禦使真宗嗣位改領懷州永熙復
土提點緣路供頓咸平初出知華州占謝日面請罷

昭宣使從之實以禦侮正秩奉給優厚故也上幸大名為東京舊城都巡檢使明年以風痺請告遣還本郡是冬卒年六十四贈邕州觀察使延德所至好撰集近事掌御厨則為司膳錄掌皇城司則為皇城紀事錄從郊祀為行宮使則為南郊錄奉詔修內則為版築記從靈駕則為永熙皇堂錄山陵提轄諸司記及治郡則為下車奏報錄先是詔史官修太祖太宗實錄多以國初事訪延德又上太宗南宮事迹三卷子應昌莊宅使端州團練使

常延信并州平晉人祖思仕周歷昭義歸德平盧三

四子个
鎮節度延信皆補牙職領和州刺史思卒入爲六宅
使領郡如故建隆初改領平州坐與妻族相訟左授
右監門衛副率領護滑州黃河隄開寶中爲京新城
外汴河南巡檢出爲潼關監軍延信以關路巖險奏
易道路及填禁阬役工四十餘萬又監通許鎮兵改
梓遂十二州都巡檢使賜袍帶錢百萬太平興國初
秩滿留再任賜錢四十萬時亡命卒多以山林爲寇
延信嘗領徒捕殺三百餘人又爲唐鄧都巡檢使代
還繼改右清道右司禦二副率雍熙三年命督鎮州
以北至軍前芻糧是冬爲全邵六州都巡檢使令疾

置之任就充羊狀六砦都鈐轄遷右衛副率會誠州蠻歸欵命延信馳入溪洞索其要領又逐蠻直趣古鎮過西延大木諸洞蠻人懼伏淳化中歷襄鄧宋曹等州都巡檢使改左監門衛將軍屢部徒修護河防改左領軍左屯衛二將軍充西京水南都巡檢使有盜掠彭婆鎮及甲馬營延信馳以往悉擒之咸平中歷太康鞏縣二監軍景德二年卒年六十四

程德玄字禹錫鄭州滎澤人善醫術太宗尹京邑召置左右署押衙頗親信用事太祖大漸之夕德玄宿信陵坊夜有扣關疾呼趣赴宮邸者德玄遽起不暇

盤擲詣府府門尚關方三鼓德玄不自悟盤桓久之
俄頃見內侍王繼恩馳至稱遺詔迎太宗即位德玄
因從以入拜翰林使太平興國二年陳洪進來朝命
德玄迎勞之船艦度淮暴風起衆恐皆請勿進德玄
曰吾將君命豈避險以酒祝而行風浪遽止三年遷
東上閣門使兼翰林司事是秋領代州刺史從征太
原爲行宮使師還以功改判四方館事俄遷領本州
團練使又加領本州防禦使五年坐市秦隴竹木聯
筏入京師所過矯制免筭又高其估以入官爲王仁
贍所發責授東上閣門使領本州刺史陝府西南轉

運使左拾遺韋務昇京西轉運使起居舍人程能判
官右贊善大夫時載坐縱德玄等於部下私販鬻務
昇洎能並責授右贊善大夫載將作監丞是冬車駕
幸魏府命總御營四面巡檢掌給諸軍資糧德玄攀
附至近列上頗信其言繇是趨附者甚衆或言其交
游太盛遂出為崇信軍節度行軍司馬踰年復拜慈
州刺史移知環州時西鄙酋豪相繼內附詔以空名
告敕百道付德玄得便宜補授頃之以疾求致仕優
詔不許淳化三年改本州團練使知邠州未半歲復
典環州李順之寇西蜀移知鳳州兼領鳳成階文等

二百九十五个
州駐泊兵馬事徙慶州咸平中入朝真宗命坐撫勞
訪以邊事俄出知并州兼并代副都部署移鎮州受
代歸闕景德初卒年六十五大中祥符中其子繼宗
上章懇祈贈典上憫之特贈鄭州防禦使兄德元同
仕王府至內酒坊副使繼宗東頭供奉官閣門祇候
次子繼忠內殿崇班德元子賁大中祥符五年舉進
士累遷太常博士

王延德大名人少給事晉邸太平興國初補殿前承
旨再遷供奉官六年會高昌國遣使朝貢太宗以遠
人輸誠遣延德與殿前承旨白勳使焉自夏州渡河

經沙磧歷伊州望北庭萬五千里雍熙二年使還撰
西州程記以獻授崇儀副使掌御厨明年拜正使出
知慶州淳化三年代還監折博倉延德與張齊賢善
因國子博士朱貽業通言齊賢求免掌庾希進用齊
賢爲言之上怒曰延德願掌倉以自效未踰月又禱
宰相求免何也因召延德詰責自言未嘗遣貽業詣
相府有所求請上疑齊賢不實召貽業至貽業又諱
之齊賢耻自辨因頓首稱罪上怒即以延德領懿州
刺史以寵之五年提點三司衙司磨勘憑由司未幾
拜左屯衛大將軍樞密都承旨俄授度支使真宗即

四日令二个
位轉左千牛衛上將軍充使如故延德前使西域冒
寒不汗得風痺疾艱於步履咸平初出爲舒州團練
使知鄆州徙青州坐市物有剩利降授左武衛將軍
又病落籍遣家人代詣登聞鼓院求休致上以其文
事先帝復授左千牛衛上將軍致仕景德三年卒年
六十八延德以攀附得官傾險好進時人惡之兄延
之乾德六年進士至屯田郎中致仕

魏震不知何許人祖浩贍國軍權鹽制置使父鉞蒲
臺令震初用祖蔭當補廷職自以習詞業不屑就姚
恕嘗與鉞蒲臺交代及爲皇子教授太宗在藩邸恕

嘗稱震之材因召寘邸中即位補殿直廬壽八州巡
檢從征河東掌行在左藏庫改供奉官雍熙初温州
進瑞木成文震作詩賦以獻拜崇儀副使賜白金二
千兩掌內弓箭庫出知保州會諸將北伐爲幽州西
北路鈐轄下飛狐蔚州以功就遷崇儀使知蔚州復
知保州移秦州鈐轄端拱中召拜西上閣門使俄知
廬州徙澶州淳化二年進東上閣門使知鳳州坐事
免至道初起爲洛苑使知洪州二年復爲東上閣門
使知定代二州並兼行營鈐轄咸平元年卒子致恭
殿中丞

張質字守朴博州高唐人少孤養于兄贊贊爲樞密院典謁質因得隸兵房頗爲趙普曹彬所知太宗征河東還駐鎮陽彬方典樞務一夕議調發屯兵時軍載簿領阻留在道質潛計兵數部分軍馬及得兵籍較之悉無差謬淳化中累遷本房副都承旨咸平初授左監門衛將軍樞密副都承旨先是樞密吏皆以年勞次補有至主事而憎其職者景德三年夏內出公事三條令主事以下詳決之命質與禮房副承旨尹德潤宿御書院考第翌日上親臨閱視凡選補四十餘人不中式除崇班供奉官奉職者十餘人以質

爲左屯衛大將軍加給月奉歷右神武軍右衛二大將軍大中祥符七年轉都承旨在樞要僅五十年練習事程精敏端慤未嘗有過舊本院吏罕有遷至都承旨者上素知質廉謹故以授之嘗召問五代以降洎國初軍籍更易之制且命條具利害質纂爲三篇目曰兵要以進上覽而稱善好養生之術老而不衰以是多接隱人方士然語不及公家事每大祀巡幸質多爲行宮使或領巡檢提點供頓之務天禧元年九月方候對承明殿暴中風眩輿歸卒年七十四錄其子大理評事純爲衛尉寺丞孫思道爲三班奉職

揚允恭漢州綿竹人家世豪富允恭少倜儻任俠乾德中王師平蜀群盜竊發允恭裁弱冠率鄉里子弟若于清泉鄉為賊所獲將殺之允恭曰苟活我當助爾賊素聞其豪宗乃釋之陰結賊帥子日與飲博陽不勝償以貲使伺賊賊將害允恭其子以告因遁去內客省使丁德裕討賊至州允恭以策干之署綿漢招收巡檢賊平補殿前承旨太平興國中以殿直掌廣州市舶自南漢之後海賊子孫相襲大者及數百人州縣苦之允恭因部運入奏其事太宗即命為廣連都巡檢使又以海鹽盜入嶺北民犯者衆請建大

庾縣爲軍官輦鹽市之詔建爲南安軍自是冒禁者少賊有葉氏者衆五百餘往來海上允恭集水軍造輕舫掩襲其首斬之餘黨棄船走伏匿山谷允恭伐木開道悉殲焉賊寇每遇風濤則避止洲島間允恭領衆涉海捕之殆盡賊皆望風奔潰又抵漳泉賊所止處盡奪先所劫男女六十餘口還其家詔書嘉獎賜錢十萬轉供奉官詔歸改內殿崇班時緣江多賊命督江南水運因捕寇黨行及臨江軍擇驍卒拏輕舟伺下江賊所止夜發軍城三鼓遇賊百餘拒敵久之悉梟其首又趣通州境上躡海賊賊係衆舟張幕

發勁弩短礮允恭兵刃所向多爲幕所縈礮中允恭左肩流血及袖容色彌壯徐遣善泗者以繩連鐵鈎散擲之壞其幕士卒爭進賊赴水死者大半擒數百人自是江路無剽掠之患以功轉洛苑副使江淮兩浙都大發運擘畫茶鹽捕賊事賜紫袍金帶錢五十萬先是三路轉運使各領其職或廩度多積而軍士舟楫不給雖以官錢雇丁男挽舟而土人憚其役以是歲上供米不過三百萬允恭盡籍三路舟卒與所運物數令諸州擇牙吏悉集允恭乃辨數授之江浙所運止于淮泗由淮泗輸京師行之一歲上供者六

百萬淳化五年轉西京作坊使初產茶之地民輸賦者悉計其直官售之精麤不校咸輸榷務商人弗肯售久即焚之允恭曰竭民利而取之積腐而棄之非善計也至道初劉式建議請廢緣江榷務許商人過江聽私貨鬻允恭以爲諸州新陳相糶兩河諸州風土各有所宜非雜以數品即商人少利請依舊江北置務均色號以年次給之事下三司鹽鐵使陳恕等以允恭議爲是詔從之即命允恭爲發運使始改擘書爲制置以西京作坊副使李延遂著作佐郎王子輿並爲同發運使巢廬江二縣舊隸廬州道遠多寇

民輸勞費允恭請以二縣建軍詔許之以無爲爲額淮南十八州軍其九禁鹽地則上下其直民利商鹽之賤故販者益衆至有持兵器往來爲盜者允恭以爲行法宜一即奏請悉禁而官遣吏主之事下三司三司言其不可允恭再三爲請太宗始從之是歲收利巨萬允恭與王子輿秦義同主茶鹽之任多作條制遂變新法真宗即位改西京左藏庫使又言川峽鐵錢之弊曰凡民田之稅昔輸銅錢之一今輸鐵錢亦一而吏卒奉舊給銅錢之一今給鐵錢五及行用交易則鐵錢之十爲銅錢之一且民入田稅以一爲

十官失其九矣吏卒奉給增一爲五官又失其四矣
吏卒得五用十復失其半矣臣在先朝嘗陳其事願
變法以革其弊先帝方議行之會賊順叛擾而止今
陛下繼成先烈可遂建其法使民不失所且饒信之
銅積數千萬若遣運于荆達于蜀蜀素多銅俾夔益遂
各置監鼓鑄歲用均給不十年悉用銅錢矣議雖未
用然自是吏卒奉給始改用十鐵錢易銅錢之一俄
知通利軍兼黃御河發運使會議減西鄙屯兵以息
轉餉召允恭與崇儀副使竇神寶閤門祗候李允則
馳往經度圖上郡縣山川之形勝允恭因建議曰自

環州入積石抵靈武七日程芻粟之運其策有三然
以人以驢其費頗煩而所載數尠莫若用諸葛亮木
牛之制以小車發卒分鋪運之每一車四人挽之旁
設兵衛加戈刃于其上寇至則聚車於中合士卒之
力禦寇于外尋為議者所沮而止復遣之任又議江
淮鹽鐵使陳恕力爭詔從允恭之議加領康州刺史
咸平初以北邊賣馬未有定直命允恭主平其估乃
置估馬司鑄印以為常制王均之亂上慮南方有聚
寇命允恭為荆湖江浙都巡檢使內殿崇班楊守遵
副之賜與甚厚二年夏以疾聞遣其子大理評事可

乘傳侍疾七月卒于并州年五十六賜其次子告同
學究出身賻錢二十萬緡百匹又以錢五萬帛五十
匹給其家命揚州官造第一區賜之允恭有膽幹能
以方略捕賊王小波之亂也李順之兄自榮據綿竹
土人多被脅從允恭兄允升第允元率鄉里子弟併
力破之又爲王師鄉導執自榮詣劔門以獻王繼恩
表其事詔賜允升學究出身授本縣令允元什邡令
明年召赴闕授允升右贊善大夫允元大理評事可
咸平元年進士喜屬文有吏幹累召試歷戶部鹽鐵
判官知洪宣潤壽潭州至都官員外郎告虞部員外

郎

秦羲字致堯江寧人世仕江左曾祖本岳州刺史祖
進遠寧國軍節度副使父承裕建州監軍使知州事
李煜之歸朝也承裕遣羲詣闕上符印太祖召見悅
其趨對詳謹補殿直令督廣濟漕船太平興國中有
南唐軍校馬光璉等亡命荆楚結徒爲盜羲受詔縛
光璉以獻太宗壯之積勞改西頭供奉官決獄于淮
南諸州淳化中又督洛南採銅雷有終稱其有心計
遣監興國軍茶務會楊允恭改茶鹽法薦羲掌真州
權務尋提點淮南西路茶鹽得羨餘十餘萬遂與允

恭同爲江淮制置擢授閣門祗候兼制置礬稅咸平
初入奏貞宗面加慰勞淮南榷鹽二歲增錢八十三
萬餘貫以勞改內殿崇班又兼制置荆湖路江南群
盜義爲民患義討捕皆盡四年領發運使事改供備
庫副使獻議增榷酤歲十八萬緡所增旣多尤爲刻
下會歲旱詔罷之景德初遷供備庫使知江陵府坐
舉官不如狀削秩大中祥符初起授供備庫副使宿
州監軍稍遷東染院副使明年廣州言澄海兵嘗捕
宜賊頗希恩桀驁軍中不能制部送闕下上以遠方
大鎮宜得材幹之臣鎮撫之宰相歷言數人皆不稱

旨上曰秦義可當此任復授供備庫使充廣州鈐轄
歷東染院使知蘇州改崇儀使提舉在京諸司庫務
因對求典藩郡遷內園使知泉州天禧四年代還道
病卒年六十四義知書好為詩喜賓客頗有士風歷
財貨之任凡十餘年精勤練習號為稱職

謝德權字士衡福州人父文節初仕王氏為候官令
後入南唐為忠烈都虞候饒州團練使以驍勇聞周
世宗南征文節獨擐甲度大江潛覘敵壘吳人號為
鐵龍後守鄂州拒宋師戰沒德權初以父死事李煜
署莊宅副使歸宋詣登聞檢院自薦補殿前承旨遷

殿直陝西巡檢以勞就改右侍禁咸陽浮橋壞轉運使宋大初命德權規畫乃築土實岸聚石爲倉用河中鐵牛之制纜以竹索繇是無患咸平二年宜州溪蠻叛命陳堯叟往經度之德權預其行以單騎入蠻境諭以朝旨衆咸聽命堯叟以聞加閣門祇候廣韶英雄連賀六州都巡檢使代歸提點京城倉草場先是唐積多患地下濕德權累甃爲臺以藉之遂無敗腐京城衢巷狹隘命德權廣之旣受詔則先撤貴要邸舍群議紛然有詔止之德權面請曰臣已受命不可中止今沮事者皆權豪輩各屋室僦資耳非有他

也上從之因條上衢巷廣袤及禁鼓昏曉之制會有
亮人劉曄僧澄雅訟執政與許州民陰構西夏為叛
者詔溫仲舒謝泌鞫問令德權監之既而按驗無狀
翌日對便殿具奏其妄泌獨曰追攝大臣獄狀乃具
德權曰泌欲陷大臣耶若使大臣無罪受辱則人君
何以使臣臣下何以事君仲舒曰德權所奏甚善上
乃可之六年命城新樂縣遷供奉官又命浚北平砦
濠葺蒲陰城一日遽乘傳詣闕求對且言邊民多挈
族入城居上前歲契丹入塞傳潛閉壘自固康保裔
被擒王師未有勝捷臣以為今歲契丹必寇內地令

邊兵聚屯一處尤非便利願速分戍鎮定高陽三路
天雄城壘闊遠請急詔蹙之仍葺澶州城北治德清
軍城漸以爲豫備臣實慮蒲陰工作未訖寇必暴至
上慰遣之旣而契丹果圍蒲陰及聞有詔修河北行
宮德權又驛奏請車駕毋度河及至澶州德權單馬
間道赴行在未幾遷內殿崇班提轄三司衙司德權
爲設條制均其差使有大將隸內侍主藏內侍爲奏
留規免煩重之役德權携奏白上極言僥倖上稱其
有守又命提總京城四排岸領護汴河兼督輦運前
是歲役浚河夫三十萬而主者因循隄防不固但挑

沙擁岸陟或河流汎濫即中流復填淤矣德權須以沙盡至土為垠棄沙隄外遣三班使者分地以主其役又為大錐以試築隄之虛實或引錐可入者即坐所轄官吏多被譴免者植樹數十萬以固岸建議廢京師鑄錢監徙西窰務于河陰大省勞費改崇儀副使兼領東西八作司先時每營造患工少至終歲不成德權按其役皆尅日而就大中祥符元年議東封命與劉承珪戚綸同計度發運遷供備庫使預修玉清昭應宮時累徙民舍以廣宮地劉承珪議掘地及丈加築以壯基址德權患其勞役過甚日與忿爭不

能奪遂求罷復領京城倉草場導金水河自皇城西
環太廟凡十餘里三年出知泗州占謝日自陳臣又
領京務頗慮中外觀聽謂臣負譴外遷願稍進其秩
詔改西染院使遣之至任踰月卒年五十八以其子
平為定遠主簿給奉終喪德權清苦幹事好興功利
多所經畫見官吏徇私者必面斥之所至整肅然喜
采察纖微以聞于上朝論惡之

閻日新宿州臨渙人少為本州牙職補三司使役吏
淳化中選隸壽王府主郎中記簿真宗即位擢為供
奉官提點雄霸靜戎軍權場咸平元年遷內殿崇班

永興軍駐泊都監徙劔門關兼知劔門縣就加供備
庫副使慶州都監景德初命管勾邠寧環州駐泊兵
馬時部署張凝屢入邊界焚族帳日新皆提兵應接
俄知涇州未幾移慶州上言野溪三門等族恃嶮隘
桀黠難制請開古川道東至樂業鎮西出府城從之
就轉供備庫使知環州兼邠寧環慶路鈐轄緣邊都
巡檢使安撫都監俄換涇原儀渭路二年遷如京使
領萬州刺史上朝陵東封皆命為行宮使大中祥符
初改文思使日新起胥史好云為以進取嘗上言群
臣子弟以蔭得官徃徃未童亂以受奉望自今年二

十以上乃給廩又京城百官早朝而學士丞郎舍人
以上導從呵止太盛難於趨避望令裁減又屢請對
多所建白且自陳筋力尚壯願正授刺郡守邊城以
効用俄真拜坊州刺史知渭州兼涇原路駐泊鈐轄
將祀汾陰故改知同州事儼信頓即日新所部車駕
至迎謁獻方物勞問乂之遂從祀睢上賜以襲衣金
帶還過新市鎮又設絲樓樂伎以迎駕明年徙知徐
州代還以足疾改又領軍衛大將軍昭州團練使知
單州疾益甚許還京師天禧初卒年六十八

靳懷德博州高唐人祖昌範殿中丞父隱禹城令懷

德太平興國中明法解褐廣安軍判官秩滿授鴻臚寺丞歷著作佐郎太子左贊善大夫通判相州改殿中丞通判廣州遷國子博士通判滄州歷虞部比部員外郎又通判莫州知德州咸平中契丹入寇懷德固守城壁又轉運使劉通言其善政連有詔褒之徙知密州會留後孔守正之鎮代還鹽鐵使陳恕判官王濟薦其武幹換如京使知邛州懷德本名湘素遊寇準之門準父名湘景德中準方為相懷德乃改名馬俄知滄州大中祥符初召還復遣之任吏民詣轉運使李士衡借留懷德士衡以聞未幾遷文思使三

年秋以江左旱歉命爲洪虔十州安撫都監未至任
改知曹州明年春選爲益州鈐轄加領長州刺史懷
德歷官以強幹稱然酗酒多失將行別詔戒勗真宗
又面諭之就遷北作坊使在劍外軍民甚畏愛之復
以善職入拜西上閣門使改領昭州刺史知澶州是
州居水陸之要懷德悉心撫治頗著政績使車徃復
多稱譽焉又知陝州踰年歸闕而卒時天禧元年年
七十三

論曰世乏全材則各錄其所長而用焉亦皆可以集
事功允恭有心計諄事是時摘山煮海方舟之漕規

制未備故因其建白而從之利甚博焉義亦精心敏
 職士大夫許其醞藉德權清廉強伎矯名好威然其
 斥謝泌以大臣非可受辱識堂陛之分長者之言哉
 延德而下遘會進陟迭居事任其指使治迹各有可
 取者焉

列傳卷第六十八

平德心玉玉早煇命為共賞十州安無勝望未至封